

MPUNGI UDI UPÀTULA

MWADI MULUBÌDÌLE



Twasàkidila wa manza tètè, Mwanèètù Demos. Ndyèsè dinène bwà kwikala mwaba ewu mu disangisha dyà beena Kilistò edi dilòòlò edi, muneemu mu ditungà dyà mabwe à mashika emu. Kadi ndi mubiikile kumbèlu, katanci aka, luuyà ndutambidile ne degrés dikumi ne umwe, lwà ku Nord kwàka, kupita mùdibi muneemu. Ndi ne cyà kwikala mulwè nawu's. Nèndwijakajè bwà kwalukila kàbidi, ne lùkàsà lwònsò. Bikùnyiiibwa byònsò bidi munkaci mwà kukwàta mabwe à mashika. Udikù pèèbè wela meeji kaayi bwà ciinè aci's, Creechy? Cidi... [Mwanèètù wa balùme awu ùdi wamba ne: "Kùdi mashika."—Muf.] Kùdi mashika cyà bushùwà.

² Nènku ndi ne disànkà dyàbúngì dyà kutwilanganakù ne mpaasàtà mulenga ewu, dilòòlò edi, ne kunùmònakù nwènù aba. Ndi mfùma ku dibwela, katanci kakesè aka. Ndi mfùmina ku Tucson, kùwà kùkèngelà bwà mèmè kuya leelù ewu. Ndi mwendèshe kàshinyi makèlèlè dilòòlò awu, ne mufikè lwà pa dîbà ibidi ne citùpà mu dindà emu, mu Tucson. Ne pashiishe mèmè kushàala mwimane kuulu ditùkù dijimà, kuntwaku. Ne mukùmùke kwènji ànu katanci kakesè cyanààna... Èè, ndi mufikè, mwikàle apa kwènji ànu bu dîbà dijimà ne citùpà nànkù, ngeela meeji, cintu bu nànkù awu, muneemu. Ne pa nànkù ncyèna mupetèku kalù kèètù aka to. Kàdi nènditacìshè bwà kubènga kuya mu tulù mwab'ewu. Kàdi tudi—tudi ne disànkà dyà kwikala mwab'ewu.

³ Mwànà mukèsè wa balùme ewu, udi unàyila pabwìpi ne bikòkòkò ebi ewu. Mwà musòmbe paanyimà pààpa, pa... kàmwe kàa ku tunkwasa twà bânà bakesè. Mwànà mukèsè wa balùme kulwayè, kuntàngilayè mu mùshindù wà pabwàwù menemene. Mèmè kwamba ne: "Twètù bònsò bânà tudi mwà kusòmba pàmwè, kî mmwòmò anyi?" Mpindyewu, ncyà bushùwà ne mèmè ntu munange bânà bakesè abu's, nànsha nànkù.

⁴ Nènku bidi, kàa, mbilenga be bwà kwikala kaaba aka dilòòlò edi, ne kwikala ne batèeleji balenga aba biimàne myaba yònsò. Ne ndi mutwishiiibwe mpindyewu ne Mwanèètù Williams mmunwàmbile byònsò, ne Mwanèètù Rose ewu, bwà mpungilu ulwàlwà awu. Ngeela meeji ne nudi bamumanyè bimpè. Bwà kwikala ku Ramada, dyàkàmwè, mpungilu wa Beena Kantu—ku-byanza awu. Nènku tudi batèkèmène cikondo cyà dicyònkòmòka kuntwaku. Mwanèètù Velmer Gardner, mwakudi mulenga be, wa dipòko; ne bakwàbo bambi, Oral Roberts ne bàabúngì,

nebiikalèku. Nènkutudi batèkèmène cikondo cyà dicyònkòmoka mu Mukalenge.

⁵ Ndi ntèkemenena ne, bìmwè byà ku bikondo ebi, twènzàayi masangisha àà dyondopa mu mwaba awu. Uh-huh. Ndi njinga kwangata Mwanèètù Oral, bwà twadisangisha pàmwè. Èyowà's, mukalenge. Abi kî mbifwànyineku kwikala ànu bilenga anyi? Aci ncifwànyine kwikala pàà—pàà kubwelela pàà cyà bushùwà, kî mmwòmò anyi? Masangisha àà dyondopa, mu Ramada mwàmwa, mbifwànyine kwikala bîmpè. Tudi... Pa nàнку tudi bafwànyine kwenza nàнку, nudi bamanyè's. Mukalenge mmufwànyine kutùpèeshakù cyôci aci, bwà kwenza masangisha àà dyondopa. Pa nàнку netwikalè mwa... Kunyunguluka mpindyewu, ku èkèleeziyà ne ku èkèleeziyà, bwà kuteetakù bwà kutangalaja nguumu mîmpè, ne kuswikakana muntu ne mukwèndè, ne kwenza bwobùmwe mu èkèleeziyà mishilèshilàngàne yònsò ayi. Ki citùdi twitabuuja ne, tudi umwe, mu Kilistò.

⁶ Mvwa nyiikilangana ditùkù adi ne ngàngàbukà kampànda. Ndi ndilongolola bwà kuya dyàmwàmwa dyà mbù, ne bìdi bikèngela bwà kukwenzabò mateeta à mubidi. Pa nàнку mvwa muntwamu bwà diteeta kampànda. Ki yèyè kungeelayè ku òmwè dyà ku mavwala awu... Mèmè... Kanunkonkùku ne ncinyi to. Ki kupetayè cintu cyà pabwàci. Ki kwalukilayè kàdi kupangayè mwà kucijingulula, ki kwenzayè cisangilu cyà bangàngàbukà, kàdi kàyi ànu mwà kuumvwa cyôci aci to. Yèyè ne: "Ncitungù mwanji kumòna cyà nàнку kacya kwònsò eku to." Nènkutudi kundeejayè fòtò waci, mùtùbi pa ciibidilu ne kondò kàà mwoyi, ne mùdi ne kandòndò kàà mwoyi, ne mùdibi kule menemene eci ne eci. Kàdi kumònayè pa byànyì mèmè ne bìvwa byònsò bibidi ànu pàmwè. Yèyè ne: "Wèwè udi muntu wa pabwèndè menemene."

Mèmè ne: "Ntu misangu yònsò ànu mumanyè nàнку. Bantu bònsò mbamanyè."

⁷ Yèyè ne: "Katùtùkù banji kumòna cyà nàнку kacya kwònsò eku to." Pa nàнку ki kuditwayè mu dicìndondela's.

⁸ Mèmè ne: "Èè," mèmè ne, "udi mumanyè's, ngeela meeji ne m'Mukalenge mwîmpè awu, pàdiYe útwenza apu, Ùdi útwenza ànu bashilàngàne ndambù. Katùtu bafwànàngàne muntu ne mukwèndè to, ne pa nàнку mîngà misangu katùtu nànsha mene twenza maalu mafwànàngàne muntu ne mukwèndè to. Kàdi—kàdi Yèyè ùdi ùcyènza Bwèndè... mùshindù Wèndè wà Sungasunga wà dicyènza. Twètù tudi tubwela ànu mu màshinyi manènè à difwimbila awu, ne tushàala ànu bapùwe, Yèyè ngudi utúfwimba mùdiYe Yèyè muswè amu."

⁹ Ne mèmè—mèmè ndi mumanyè ne muntu nànsha umwe kî mmufwànyineku kujinga kwikala cîngà cintu to ànu cyúdi aci. Cintu cimwèpelè citùdiku twètù bònsò mwà kujinga...

Paanyimà pàà twètù bamanè kusùngidiibwa ne balwè bàna bàà Nzambì, cintu cimwèpelè citùdiku baswè cidi ànu lwendu lwà lutàmbe kwikala lwà sheemàsheemà ndambu ditùkù dyònsò. Ki citùdì tujinga twamba kufwà aci, mbwobùmwe bunène abu. Mùshindù mwinè wùdibi bilenga bilayà's wè! Udikù mufwànyine kwimana bwà kwelangana meeji ne ncinyi citùvwàku bafwànyine kwenza bu katùyi ne cyòci aci anyi? Ncinyi—ncinyi. . . Bu ne ditèkemena dinène adi kadìvwa munda mwètù, citùvwà bafwànyine kwenza ncinyi?

¹⁰ Mvwa ngamba, mu umwe wa ku maèkèleeziyà, ndi mwa. . . Dyàmbedi, mwaba ùmwè, pashiishe mukwabo, ne mu ditùngà dijimà ndi mingà misangu ngamba bwalu kampànda, ngeela meeji ne ndi mufwànyine kubwàmbulula mu èkèleeziyà umwèumwè awu. Kàdi mvwa munkaci mwà kupàtuka mu nzùbu mùmvwà mfùma ku dyamba bintu byà bujitu, bwà bantu aba leelù ewu bàjaaja maja mapyamàpyà àdibo nawu, àdibo bàbìikila ne mmaja à dijeekaja dyà nyimà aa, anyi cintu kampànda. Ki mèmè ne: “Ncyèna ànu mumanyè, cidi bàà pa buloba, bantu baswila kucibula mikòlò yàbò ne—ne kwenza maalu mùshindù awu to.”

¹¹ Pa nàнку, kùvwa muntu, wa bidimu bitwè ku makùmi àbidì ne bisambòmbò, makùmi àbidì ne mwandamutekète, mulwè kutwìlangana naanyì mu ndekeelu amu, yèyè ne: “Anji indilàbi kakesè, Mukalenge Branham.”

Mèmè ne: “Èyowà's, mukalenge?”

Yèyè ne: “Udi mumanyè's, kwèna ànu umvwa to.”

Mèmè ne: “Ndi ntèkemena ne ncyàdyàkuumvwakù to.”

¹² Ki yèyè ne: “Udi umòna's,” yèyè ne, “mèmè's ndi mwà kumòna webè mmwènenu awu.” Yèyè ne: “Wèwè udi muntu wa bidimu makùmi àtaanu. Kàdi bu ne uvwa wa bukolè bwànyì ebu, nùku mbishiilàngàne.”

¹³ Mèmè ne: “Anji indilàbi kakesè tǔng.” Mèmè ne: “Mvwa nyiisha Èvànjeeliyò pàncivwà ne bidimu dikùmi bishàadile ku byèbè abi. Ncidi ànu ngiitabuujja Èvànjeeliyò umwèumwè awu. Ndi mupetè cintu kampànda cidi cyangatà kaaba, ne disànkà dyàbùngì mu dikwàcila dyà Mukalenge mudimu kutàmba bintu byònsò bivwa dyabulù mufwànyine kukwàtakaja mwaba kanà wònsò.” Cidi. . . Ki cidi cìfla disànkishiibwa.

¹⁴ Nudi bamanyè's, Davidi wàkamba, musangu kampànda ne: “Ànu mùdi ngulungù ùjinga kasulù kàà màyi, musùuka wànyì wùdi wùKujinga Wèwè, Éyi Nzambì.”

¹⁵ Ne bu nwènù mwà kwikalakù bamòne umwe wa ku nyama mikesè ayi, pàdiye—pàdiye mutàpiibwe mpùtà; pàmwàpa mbwa nyìvwà mimukwàte, ne mimutùùle dihùnda dyà munyìinyi mu lubadi emu, anyi cintu kampànda. Ùdi ùzònta mashi. Nènku, yèyè, mbwà awu ùdi mwà kumulondakaja mu mupwa amu.

Yéyè kèna mùdi muntu to. Ne yéyè ùdi mwà kulumbatanga ne kashà aku nànsha kòkò kàzònta mashi anyi to. Nànku mùshindù wùmwèpelè. . . Kashà aku kòkò kàzònta mashi, mùshindù wùmwèpelè wùdiko mwà kushààla ne mwoyi ngwà kufika kùdi màyi asanganyibwa. Ne bu kòkò ànu mwà kufika mwaba ùdi màyi, nekànwe màyi awu. Neimanyikè dizòntà dyà mashi adi, ne—ne kàdi mwà kupànduka. Kòkò kàdi ne meeji matwè.

¹⁶ Kàdi mpindyewu's nudikù mwà kudifwànyikijila, pa kumòna umwe wa ku nyama mikesè ayi mutàpa mpùtà ne ùzònta mashi, ne mùshindù ùdi ànu mutù wèndè mukesè awu mwela muulu, ne cyumvwilu cyònsò cidiye naaci bwà kujandula mwaba wùdi màyi, ne dyùlù dyèndè adi. Ùdi, ànu ne cyà kupeta màyi, anyi kufwà. Nènku mpindyewu cidi ànu mwoyi ne lufù, bwèndè yéyè. Yéyè, ànu kaadipembu kònsò—kònsò—kònsò kàdiye ùmvwa, ùdi ùteeta, ùjinga ne mwoyi mujimà. Ùdi ne cyà kuàpeta.

¹⁷ Mpindyewu, mùshindù awu ngùvwàbi bikèngela bwà twètù kwikala ne nyòotà yà Nzambì. Nwamònu anyi? “Ànu mùdi ngulungù ùjinga kasùlù kàà màyi, musùuka wànyì wùdi wùKujinga Wèwè, Éyì Nzambì.” Kwikala musokoma Nèndè mu mwaba kampànda, ki dijinga dyà mwoyi wànyì. Ne ndi mutwìshìibwe ne ki dijinga dyà yònsò udi kaaba aka dilòlò edi.

¹⁸ Nènku mpindyewu, bufükù ne bufükù bwònsò, ne mèmè ntu munangè kumònaku nunku. Mpàlà yùdi umòna ku mwaba kampànda ayi, uyimòna ku mukwàbò mwaba. Mèmè—mèmè ntu munangè aci. Nuleeja bwobùmwè bwènu, ne nwamba patòòke citùdi bavwilè kaaba aka aci.

¹⁹ Nènku, kaa, ncyà bushùwà ne ntu mufwànyine kunanga kumòna ditàbuluja dyà cyena-kale mu Phoenix. Kaa, ekèlekèle! Mwakù awu *Phoenix* mmuntùpìshe ne disànka kacya ànu musangu mene wà kumpàla wùngààkawùbalà, pa bwalu bwawù ne: Phoenix, mu Arizona. Ekèlekèle, mvwa mwànà mutekète, mèmè kudyàmbidila ne: “Ngìkalakù mwà kafika kiinè kaaba aku's wè! Ngìkalakù mwà kakùfika, ku Phoenix aku!” Nènku mpindyewu pàndi mmùmòna, ne patùdi mwab'ewu tudi tusanganà ne mmutùkine mu ndòndò wa mpèkaatù, ànu mùdi mikwàbò myaba yònsò amu, beena lwendu lwà dibandila dyà myaba badishindemù; ne dinwà dyà maalà, dipìcishila dyà dībà mu dinwà dyà maalà, nsòmbelu wa masandi, byònsò abi ne kabishàadi.

²⁰ Kàdi, nànsha nànku, munkaci mwà biinè byònsò abi, udi usanganamu àmwè mabwe a mushinga mukolè àdi Nzambì munyùkùshe mu cipeela emu, àdi àkenkà ku cifulu cyà butùmbi cyà cisàmbà cyà Nzambì. Nènku ki cìndi muvwilè kaaba aka, dilòlò edi, mbwà mèmè kudifila pàmwè neenù nwènu bàna bèètù bàà balùmè ne bàà bakàji, bwà kuteetakù kukenkeshila bakwàbò Bukènkè bwà Mukalenge Yesù, bwà bààmòna mwà

kupeteka, bôbô pààbò, mu cimvundù cinène eci. Ne bààbûngì bàà kùdìbò bàcìdì pambèlù pààpa. Mémè ndi mutwishiiibwa nànkù. Kùcìdì ànu bààbûngì bàdì ne cyà kubwela, ne tudi ne cyà kwenza cyònsò citùdì mwà kwenza bwà kubàpeta kwòkò aku, ne kwikalabò ne nsòmbelu wíkala mwà kuleeja Kilistò.

²¹ Mpindyewu, kumpàlà mene kwà twétù kubala kaacyena-bwalu kakesè kàà Mifùndu. . . Mvwa mulwè pashiishe bikolè mu mùshindù wà ne ndi mufunde lùkàsàlùkàsà tuntu, mu tusunsa twà dìbà tutwè ku tùtaanu nànkù. Kàdì cibambalu cyà bitàdì cyà bukalenge bwà cisangàngànga ncifùme ku dintùmina tubèjì twà kwaluja, tùndi ne cyà kubweja dyàkàmwè, kadi bikèngela citwibwè citampì cyà ku poste, ngeela meeji, pàmwàpa ndeelù ewu, nànsha nànkù. Nènku bìdì bikèngela bwà mbwelè mu nzùbu wa poste amu. Nènku pàngààbwedi, Billy kwambaye ne: “Mbîmpè ùlwìjakajè.” Nènku apa. . .

²² Mémè kubanga ànu kunyùnguluka, kunyùnguluka, kunyùnguluka, ne bantu abu. Ekèlekèle, kaa, ekèlekèle! Bàdì bàmba bwà bwakàne ku biibi byà nzùbu wa tubàdì. Ndi ndìkonka kùdìbù's. Èyowà. Ncìtukù mwanjì kumòna bya mùshindù awu to. Nènku bàvwa baswè bwà mfutè citàdì pa kabèjì kònsò kàà shekè kàvwàbò bampèeshe munda mwà bidimu makùmi àtaanu bikaadi bipite abi, bwà kufuta mabànzà à kàmpanyè, ne cibawu citentekapù, nwamònu's, ndola binunu nkàmà yìsàtù ne makùmi àtaanu ne bitaanu.

²³ Mémè ne: “Ngaasàayi ànu cingoma cyanàànà.” Ndi mufwànyìnekù kwenza ciinè aci bìshi's? Mémè ne: “Mémè ncìyi nànsha mene ne meeyà mapìta pa makùmi àtaanu ne àtaanu to.” Mémè ne: “Ndi mufwànyìnekù kwenza ciinè aci bìshi?” Ne bôbò mbambàmbìle panshì kùkaadi bidimu bitaanu.

²⁴ Pa nànkù, bwà bìdì bantu bàsangìsha. Bu mutùdì, twenza kàmpanyè, ne—ne bantu, mbamanyè ànu ne dìnà dyànyì ng'William Branham cyanàànà, bàdì bènza ànu shekè bwà mfrangà yà ditùla cyanàànà. Bambi mbàtù bàtàngìla bwalu abu. Ncìtukù mwanjì kwangata mulàmbù to kacya bàndela. Ne pa nànkù bàdì bàngata. . . Ntu ngàngata difutu ku—ku èkèleeziyà wanyì, ndola lukàmà ku lumingu.

²⁵ Nènku mulàmbù ewu. . . Kàdì dìnà mulàmbù wònsò, nwamònu's, bwà kwelabò aci mu. . . Ki pàakacyàbu mu dindà, ewu u—u—uvwa mfùmù wa kasùmbù kàà maalu à mpetu awu, kulwayè è kwambayè ne: “Mwanèètù Branham, bikèngela wèlè cyàlà pa shèke eyi's.” Nènku, mòna's, mvwa ngeelapù ànu cyàlà cyanàànà. Úvwa uyèèlamù. Ki dìbà adi bôbò kutùkenketa twònsò atu, nènku dyeyà nànsha dìmwè kadìvwakù dintùùdila mémè to. Kàdì pàmvwà ngeela cyàlà pa shekè awu, bàvwa bàmba ne úvwa ngwanyì mémè. Bantu bàvwa bàmumpèesha, pashiishe mémè mmupèesha èkèleeziyà. Kaa, ekèlekèle!

26 Mémè kwanji kudyùmvwa bibi be, dyàmbedi, pashiishe mémè kulwa kujandula ne muntu yònsò mu Bible, ngeela meeji, uvwakù ne mudimu wà nyumà bwà Nzambì ewu, ùvwa muswikàkàne ne makalenge à cinsangànsàngà. Cikenkètaayi nùmonè. Ncyà bushùwà. Mòsà, Danyèlè, Yone Mubàtiji. Yesù Kilistò wàkafwila ku cyanza cyà bukalenge bwà cinsangànsàngà, ku dinyooka dyà lufù. Peetèlo, Yakòbò, Yone, Yone wa Bwàkabuulwibwà awu, bònsò, yònsò. . . Bònsò bàakapeta dikèngeshiibwa.

27 Bwà cinyi? Nnkwasa wa Sàtaanà. Nutu bamanyè nànkù anyi? Nutukù bamanyè ne, Sàtaanà wàkabàndisha Yesù ne kuMuleejayè makalenge ónsò, à pa buloba, mu katanci kàà díbà anyi? Ki yéyè kwamba ne: “Ngànyì mémè. Ndi ngenza naawò cyònsò cindì muswè. Nwamònu anyi? Nènkù nènKupèèshèwu Wèwè mupòne pànshì munkuukwile.” Nudi numòna ne ngàà nganyì anyi? Tutu tuumvwa bibi bwà kwela meeji awu bwà bwètù bukalenge, kàdi’s ke mùdìbi.

28 Ki kwambaYè, Yesù kwambaYè ne: “Kàtukà apa, Sàtaanà.” Ùvwa mumanyè ne Yéyè nguvwa mwà kulwa mupyànyi wawù, mu Bukalenge bwà bidimu cinunu. Ùvwa mumanyè ne àvwa mwà kwikala Èndè pàvwà. . . Pàvwàbi ne, bu matùnga aa malombola kùdì Nzambi, Bukalenge bwà bidimu cinunu’s bùvwa mwà kwikalakù. Kàdi nekùlwe cikondo.

29 Bòbò bàdi ne maa O.N.U. ne Nsangilu yà Matùnga, ne byònsò, bwà kuteeta kutwàla ditalala. Kàdi pàcidìbi ànu ne Sàtaanà ngudi kumutù kwèndè, ne kwà cidìdì, cyènzekà ncinyi? Nebàlwanganè cyà bushùwà ànu mùdìku buloba emu.

30 Kàdi nekùlwe cikondo cìikalà byà mvità byònsò mwà kwikala byungwija. Ne bikàshì nebidilè, ne dindà nedicye dyà Cyendèlèlèlè, dyà dibàlakana ne ditòòke tòò. Mfùmù wetù neàngatè nkwasa Wendè wa butùmbi. Kaa! Nèkwikalè misambu; nèkwikalè mbilà. Ne nèkwikalè dibèndelà dimwèpelè, cisàmbà cimwèpelè, ditùngà dimwèpelè, dyàkula mwakulu wùmwèpelè, wà mu Dyulu. Amen. Ndi njinga cikondo aci ngamba kufwà. Ne ndi nkolesha mutàngile ku kiipàcilà aku, mweyèmene Nzambi, díngà ditùkù pìikalàku kujikè, ndi mwà kwamba. . . Ndi mwà kuMuumvwa ùngambila ne: “Bànda kuulu eku.”

31 Ndi nsanganyiibwa mu Phoenix emu dilòlò edi mu Dìna dyà Mukalenge. Ncyèna mufwànyine—mufwànyine kuteeta kuumvwija cidì cyenzèke to. Bààbúngì bàà kunùdì nwènu bàdì bàngatà mikàbà yà mèyì, ikàlaayi batwìshìibwe bwà kupeta wà ne, *Tudi Dìbà Kaayi, Mukalenge?* Awu wùvwa nkumpàlà menemene kwà mémè kuumuka kumbèlu. Cikèènà-kumòna ncidì cintùmà mwab’ewu; bìdi ne, ncyèna mumanyè cìvwà. . . Ncyèna. . . Mémè ncyèna musùmbishi wa mikàbà yà mèyì to, ne ncìtu nsùminyina pa bintu abi to. Tudi tuyipeta, ne tudi ne mudimu wà dyela dyà mikàbà yà mèyì pa buloba bujimà.

Wùbwela mu bisuku ne meetu ne myaba yònsò, bàdi ne kantu kakesè kàdìbo bàpàyika mu maci, kàdìbo naakù, ne kàdìbo mwà kubweja mu mukàbà wà mēyì, kàdi kwimana mwaba awu ne kukùdimuna cyòci aci buludì mu mwakulu wàbò. Nènku cidi cìya pa buloba bujimà.

³² Nènku, kàdi ewu wùmwà naawù, wà ne *Tudi Dìbà Kaayi, Mukalenge?* Anyi, *Eci Ki Cikondo Anyi, Mukalenge?* Bàmwe . . . Ndi . . . Mu diisambòmbò dilòlò, kukaadi mbingu yisàtu mijimà, ku èkèleeziyà. Paanyimà pàà mwoyi wànyì ònsò wà dimònà dyà bikèènà-kumòna, ncìvwakù mwanjì kupeta cintu bu cyòci eci kwònsò eku to, kacya bándela. Ne ncyèna mumanyè ne ncinyi to. Mémè ndi ànu kaaba aka, kàdi Yèyè ngùdi muntùme kaaba aka. Ncyèna mumanyè cìdici cyùmwija to. Ndi ànu . . . Ndi mémè ànu kaaba aka.

³³ Nènku ndi ne cyà kwikala wa bèeyemena ne wa meeji matòoke, ne ki mùshindù wùmwèpelè wutwikalàku mwà kufika mu mwaba kampànda ne Nzambi, ngwà kwikala ne meeji matòoke. Bwalu, bantu nebàmanyè. Nzambi mmumanyè, ku cibangidilu aku ne, kwèna, bwà ne wèwè udi wa bèeyemena ne wa meeji matòoke anyi kwèna wa nànu. Ne bantu nebàmanyè. Bwalu, musangu kampànda, kùvwa muntu kampànda ùteeta bwà kwamba cipròfetà. Ki Nzambi kwambila . . . Anyi, mupròfetà mulelèlè awu kumwambilayè, kwamba ne: “Tùvulukàayi. Kùkaavwakù bapròfetà kumpàlà kwètù. Mupròfetà ùtu ùmanyiibwa ànu pàdi cipròfetà cyèndè cyùwùla.” Pa nànu ngbìmpè twikalè batwishiiibwe ne tudi bamanyè ne Nzambi ngudi mwambè nànu, kumpàlà kwà twètù kwamba nì ncinyi nì ncinyi pa bwalu abu. Ikàlà wa bèeyemena ne wa meeji matòoke.

³⁴ Mpindyewu twinyikàayi mitù yètù bwà katanci kakesè cyanàana bwà disambila. Mpindyewu tuteekàayi ku luseke lutàtù lwònsò mpindyewu, bwà tusunsa tukesè tùdi tùlondà etu. Ndi ndikonka . . . Mu kasùmbù kakesè kalenga kàa bantu aka mwab’ewu dilòlò edi, Ndi mumanyè ne kùdi mabwe a musinga mukolè awu masòmbe kaaba aka àlwà Yesù kwangata dīngà ditùkù, ikalà mwà kupàtuka mu lupwishi.

³⁵ Ne nkufwànyine kwikala bàmwè mwab’ewu bàdi kabàyi batwishiiibwe ànu menemene ne nebiikalèku, anyi kabàakwikalàku. Udi mufwànyine kwikala ne dijinga dyà bìngà bintu. Kwòkò dijinga kampànda mu nsòmbelu webè dilòlò edi, dimanyishè kùdi Nzambi, paùdi ànu wela cyanàànà cianza muulu apu, wamba ànu ne: “Nzambi, Wèwè udi mumanyè cìndi njinga kwamba mpindyewu aci. Nènku mbènèshèku. Ndi—ndi nsaama. Ndi dijinga ne dyondopiibwa. Ndi—ndi mupàmbùke. Ndi ne dijinga dyà kwalukila ku bwòbùmwè kampànda. Ndi—ndi muswè kwalukila. Ndi—ndi mupàmbùkèpàmbùke. Nyewù

ngaalukila. Ndi muswè bwà Ùnkwàcishèku, dilòòlò edi, bwà kwalukila.” Nzambi ànùbènèshè.

³⁶ Taatù wa mu Dyulu, mpindyewu patùdì tuseemena ku nkwaswa Webè wa butùmbi apa, ku njila wa Mashi. Bwalu... Kabidi Aalònà úvwa úbwela kumpàlà kwà—kwà nkwaswa wa ngàsà, wànji kwangata, dyambèdi, mashi mu cyanza cyèndè, ne ùya kumpàlà. Nènku twétù, ku diitabuuja dilòòlò edi, tudi twakidila Mashi a Mukalenge Yesù, ne tuya batàngile ku nkwaswa wa butùmbi wa Nzambi, ne dikima dyònsò, bamanyè ne tudi ne bukenji bwà kulwa, kabiyi ku bwakànè bwètù twètù biine to, kàdi ku Bwèndè Yéyè. Mashi àdi àleeja dikezudiibwa dyètù. Nènku ndi ndòmba, Taatù wa mu Dyulu, bwà Wèwè kutùpèeshakù dilòmbà dyètù adi.

³⁷ Dyàmbedi, tudi baswè kulòmba bwà Wikalèku neetù luse, utúfwila luse ku dishipa dyètù dyònsò dyà mikenji, patùdì tutonda ntùpàkanyì yètù apa, ne tuumapanga twètù twà tukesètukesè, ne mpèkaatù yètù yà mu musokoko, ne mpèkaatù yètù yìdì kayìyi mimanyìke. Ne tudi kàbìdi tutonda twètù bu bambi, biikàle baakwidì, mpèkaatù yà cisàmbà. Bònsò pàmwè, Mukalenge, tudi biimàne kuulu. Tudi banangè cisàmbà. Tudi tudyùmvwa mùvwà Mòsà pàakadyèlàyè pankaci apu, bwà kulama cisàmbà, ku ciiji cicolè cyà Nzambi. Dileeja kaayì dyà patòoke dinkwaci's wè, dyà bwakànè bwà Kilistò, pàakaDyèlè Kilistò pankaci, bwà kusungila cisàmbà.

³⁸ Nènku, Taatù, twètù bu basadidi Bèndè, biikàle ne Nyumà Wèndè munda mwètù, mwena Kilistò yònsò munda emu dilòòlò edi, udìpwekesha kumpàlà kwà ngènzàmpèkàatù ne: “Nzambi, ìkalàku nendè luse.” Tudi twela mbilà bwà babèèdi ne bwà bàdi mu lukèngelu, bwà byanza byà mushinga mukolè abi, bàmwè bakùlumpè, ne bàmwè bansongà, ne bàmwè bantu bashìndàme, bàdi beelè byanza muulu aba. Wèwè udi mumanyè byònsò pa bwalu abu, Mukalenge. Tudi tulòmba bwa Wèwè kwandamunakù bilondèshìle mabanji Èbè mu butùmbi.

³⁹ Swàku bwà kwikalè bààbùngì dilòòlò edi, Mukalenge, biikalà mwà kuumuka mwab'ewu, babwelè, biikàle bàsaama, swàku bwà bààlukilè, basàngàle, bondòpìbwe. Ànu cintu kampànda cyanàànà cyenzèkèku, cidìbo nànsha kabàyikù mwà kuumvwija, kàdi bamanyè ne mbasàngàle.

⁴⁰ Swàku bwà aba bàdi bapàmbùke bàye babingishìibwe, Mukalenge, bamanyè ne mbaalùkile ne bangùle Kilistò mwaba wùvwàbo baMushiile. Swàku bwà bàye, bàkenzè dyalujulula dyà bintu. Enzàku, Mukalenge, bwà aba bàtù kacya kabàyikù banjì kulwa bàpetè budishikaminyi bwà mushinga mukolè bwà kwikala basùulùdìibwe abu, bapàtùdìibwe mu nsanji, kabàciyikù kàbìdi baswikìibwe kùdi maalu à pa buloba ne madyàbakeena bwa bintu bya pànwapa ebi to, kàdi bavwijìibwe badishikàmine mu Kilistò. Enzàku nànkù, Taatù.

41 Bèleshàku byònsò bitùdi naabi dijinga mpindyewu, ne bèleshàku Dìyi Dyèbè ne musadidi Webè, nènku netùKupèeshè butùmbi. Mu Dîna dyà Yesù mmutùdi tulòmba nùnkù. Amen.

42 Mpindyewu, byòbì bikèngela bwà twètù kubala mutù wà mwandà wà Mufundu, anyi, Mufundu bwà cyena-bwalu's wè, Kolintò wa Kumpàla nshapità wa 14, mvensà wa 8, ùdi ùbadiibwa nùnkù ewu, mu Kolintò wa Kumpàla 14:8.

Bwalu mpungi yèyè ùpàtula mwadi mulubìdìle, wadìlongolola ku mvità nganyi?

43 Eci ncifwànyìnekù kwikala cyena-bwalu cikùmbàne citùdi bafwànyìne kuyiishapù mbingu yìbìdi kuumukila ku mpindyewu, ne nànsha nànkù katùyikù tulenga nzemba yàci to. Kùdi cintu kampànda pa bìdi bitàngilà Dìyi disonsola. Udi misangu yònsò ànu pa cyena-bwalu cimwèpelè aci. Udi mwà kutwàngaja Bible mujimà ne cyòcì aci. Aci mmwòmò.

44 Dìngà ditùkù muntu kampànda wàkankonka, wàmba ne: “Mmuni mùdi mwà kwikala wangata ànu cyena-bwalu cimwècimwè aci?”

Mèmè ne: “Kaa, ekèlekèle! Wèwè's udi wangatamù dyumvwija dyà cintu kanà cyònsò.”

45 Ngàkangula kasoosà kakesè kàà tubèjì túsàtù kàsanganyiibwa panshi, ne mèmè kushaala mukàlamè muulu. Muntu awu mmusòmbe kaaba aka dilòlòlò edi, wa mu Tucson. Ne tuvwa tusanganyiibwa mu Pasadena, mu Californie mwàmwa. Ki mèmè ne: “Ndi mufwànyìne kwangata kasoosà kàà tubèjì túsàtù aka ne kuyiishapù bidimu makùmi àbìdi ne bitaanu: mùdiku mwoyi kampànda, wùdi munda mwàkù awu; mùdibi ne, tubèjì túsàtù atu, twikàle búsàtù mu Umwèpelè. Nènku, kaa, kaa, kùdi ànu bintu búngi cyanààna bitùdi bafwànyìne kwambapù.”

46 Kàdi netwámbe bìshi bwà Mifundu? S'n'Dìyi dyà Nzambì. S'nDyà Cyendèlèlè. Divwa—divwa ne...KaDyènakù ne ndekeelu to. Dìdi dyènda dya ànu kuya, dya ànu kuya, dya ànu kuya. Dìdi cinyeemenu bwètù twètù.

47 Nènku mpindyewu dilòlòlò edi ndi muswè kwakula pa eci nùnkù: *Mpungi Udi Upàtula Mwadi Mulubìdìle.*

48 Mu kucyèlela kwà meeji, ànu katanci kakesè aka, pàmvwà ngeela meeji pa... cilumbù cyà bitàdi aci, mèmè kudyàmbidila ne: “Kakwèna cintu ciinè leelù ewu cidì cyà citwishìibwe to. Bintu byònsò bìdi ànu ne dilubidila.” Ne cintu kanà cyònsò cyà cilubìdìle kacýèna mwà kweyemenyiibwa to. Cintu kanà cyònsò cilubìdìle kacýèna mwà kweyemenyiibwa to. Shàala kule naaci pìikalàci kacýi cyà citwishìibwe to.

49 Wèwè ne mudimu wà bwena kantu-ku-byanza; nènku, bu mùdibi ne, tudì ne beena kantu-ku-byanza mwab'ewu, pàmwàpa bàábúngì bàà kùdìbo. Wèwè ulombola mudimu

kampàndà wùdi kawùyi wà mutwìshìibwe, kwàkwelamù mfrangà yàbùngì menemene to, bwalu mfrangà yà—yà makàsà nyà mmilubìdile, nènku kwèna mufwànyine kwelamù mfrangà yàbùngì menemene to. Anyì, wèwè mwikàle mwena kantu-ku-byanza mwìmpè, wa meeji, newànji kwindila ne kukenketa, pawikalà ne mfrangà yà kwelamù, too ne pawàpetà cintu kampàndà cyà citwìshìibwe, cintu kampàndà cyà kweyemena, cintu kampàndà cyùdi mwà kutèekela mwoyi. Bwalu, kwèna muswè kujìmija ndambù mukesè wa mfrangà wùdi mulamìnyine awu to, bwalu udi ne cyà kudìlakù, ku difutu dyà ku—dyà ku mfrangà yà makàsà àdi mapeta ku mfrangà yìdi myelamù eyi. Mòna's, bikèngela wèwè ku—kupeta cintu kampànda cyà kupetelakù cyàkudya.

⁵⁰ Nènku ndambù mukesè wa mfrangà wùdi mulamìnyine ewu, kùyédi mu mpaaya kuyìshiyamù to, bwalu bìvi nebàyìbè. Nwamònu anyi? Kwènjiku, kwènjiku aci to. Wèwè naayi, ùyèlè mu cintu kampànda. Ne pashìishe bikèngela kwikala mutwìshìibwe bwà ditwìshìibwa dyà dibùtà dyà mfrangà yèbè ayi. Kabìyi nànkù to, mòna's, kùyédimu to, nànsha kakesè.

⁵¹ Pa nànkù, ncyà bushùwà ne midimu yà dyanza yìdi pa luntekà dilòòlò edi. Mudimu kanà wònsò wà dyanza ewu, pàmwè ne yònsò, pa buloba, wùdi mu ngiikàdilù wa luntekà, bwalu buloba bùdi mu ngiikadilu wa luntekà. Kwèna ànu mwà kudyanishila to . . .

⁵² “Mpindyewu, nëndaminyinè mfrangà *bùngì kampànda*, bwà kudìbakila nzùbu mukesè mulenga, mwaba kampànda.” Aci's, aci's ncyà citànkakana's. Ndi nkwambile nànkù, bwalu bukalenge mbufwànyine kumunyènga yònsò, leelù ne màalabà.

⁵³ Kaa, bintu bìdi byènze ne mungàlààtà wètù wikalè mubole, mu mùshindù wà ne bìdi bitànkakana bikolè! Tuvwa kale wàwa tutèeka dyeyemena dyàbùngì mu mungàlààtà wètù. Nènku, ciine aci, ke cìndi ndi ngeela meeji ne ki mùshindù wùdi mutàmbe bwìmpè wà bukalenge. Kàdi, nànsha nànkù, mungàlààtà wètù wùdi wùtànkkakana. Bwalu, twètù, ditùnga edi, cisàmbà cyètù, tudì ne mukàndà wà mèyi makùlù à ditùnga, ne mukàndà wà mèyi makùlù ewu kì—kì wetù nkàmisha. Kàdi, nànsha nànkù, mukàndà wètù wà mèyi makùlù à ditùnga awu wùdi wùtànkkakana, bwalu ùkaadi mushipiibwèshipiibwè misangu ne misangu. Mukalenge Roosevelt ufwile ewu's wàkaùnyangakaja. Pa nànkù, nwamònu's, s'nudi numòna ne bàdi mwà kuùshipa. Kakwèna dyeyemena dyàbùngì dyùdi mwà kutèekamù to.

⁵⁴ Cidiidi, kaa, ekèlekèle, ditànkakana kaayi's wè! Bantu bàdi ànu bàkòkangana, bàkòkangana, pa cidiidi. Ne beena mutumba nebàjilangana, bwà bwalu abu, ne bantu bàvwàku balunda bìmpè cikondo kampànda abu. Mfùmù kampànda wa ditùnga neàjuukè, anyi muntu kampànda bwà kufilaye mpàla bwà bàmusungulè bu munène wa bampùlushi, anyi

cintu kampànda, ne mukwàbò muntu ku lukwàbò luseke lwà lupangu lwà cidiidi, ne nebàkokanganè muntu ne mukwèndé too ne mùdìbo bàlèndukilapù, cidiidi's. Kàdi ncyèna...ndi ntèkemena ne ncyèna ntàpa muntu ku mwoyi to, kàdi ndi ngeela meeji ne cintu cyònsò mu kaabujimà ncibolè. Nwamònu anyi? Èyowà's, mukalenge. Pa nàнку bwà cinyi bunùdiku bafwànyine kukòkangana ne kulèndukila pa cintu kampànda cidi kaciyi cimpè's twamb'eku twamb'eku? Ncyà bushùwà. S'mbibi be.

⁵⁵ Muntu kampànda mmungambile ditùkù adi, wàmba ne: "Ne—neùye ku masungulangana aa anyi?"

Mémè ne: "Mémè's nkàadi mumanè kusungulangana."

Yèye ne: "Kaa, mu masungulangana aa anyi?"

⁵⁶ Mémè ne: "Ndi musungùle Yesù." Mémè ne: "Nènkwanbilè. Kùvwa bantu bàbidi bààkansungula." Mémè ne: "Nzambi wàkansungula, ne dyabùlù wàkabènga kunsungula. Nènku mémè ndi musungùle Nzambi, pa nàнку ndi mwenzè disungula dimpè." Mbilondèshile kùdi wela kakànda kèèbè, muwàpàtukilà amu.

⁵⁷ Pa nàнку, mònaayi, ànu àbidi àdi panshi aa, bwà kunùleeja ànu kaaba kakesè, ne pashiishe netùbùlekèlè. Mu masungulangana à ndekeelu à Mfùmù wa ditùnga aa, pààvwàbi bijaadikiibwè kakùyì mpatà to mu Chicago ne mu myaba mishiilèshiiàngàne ne, byamù bìvwàbo naabi bwà kwenza masungulangana, ne, bìvwa bilongolola kùdi kasùmbù kàà cidiidi kàà ba-Démocrates ne, bwà ne musangu wònsò wùvwà welela Mukalenge Nixon kakànda awu, bìvwa bikèngela bwà wèlèlè Mukalenge Kennedy, musangu wùmwèwùmwè awu. Pa nàнку, kwèna ne mpùngà to. Ne bacijaadike!

⁵⁸ Nènku nuvwa bumvwè *Mukenkeci* dilòòlò adi, pàngàcibù mmwènenù mu—mucincika mu ditùngà dijimà, kubangila ànu ku Mississippi, ku esètè. Mukalenge Nixon nguvwa mupetè disungudiibwa edi, mèyì ànaayi kwà dimwè. Mmunyì mùdiku muntu mwà kupeta's? Bu ne ùvwa m'Mukalenge Kennedy, s'bvwa bifwànyine kwikala mùshindù wùmwèwùmwè awu. Ncyèna mwena kasùmbù kàà cidiidi nànsha kàmwè to.

⁵⁹ Kàànyì kasùmbù kàà cidiidi kàdi mu Dyulu, ne ndi naabò bòbò kaaba aka dilòòlò edi mene. Tudi basòmbe mu myaba yà mu Dyulu, twakula bwà wetù Mfùmù.

⁶⁰ Kàdi, nudi numòna's, ndi nteeta bwà kunwàmbila ne, bintu byà pa buloba ebi bìdi bitànkakana. Kakwènakù...kwèna mwà kutèeka dyeyemena mu byòbi to. Mbilubidile. Ne cintu kanà cyònsò cidi cilubidile, mbipicìibwe ne mémè mushiyàngàne naaci. Mémè ncitu muswè cintu cyà ciibùlòji aci to. Ncitu muswè kudisanga ku luseke lwà bintu byà ciibùlòji aku to. Ndi muswè ciikalè cilelèlè, kwikala luseke lwà lulelèlè.

⁶¹ Mpindyewu, nsòmbelu wa mu dîkù ùkaadi mulubidile. Nudi bamanyè's, mvwa mumòne bwalu ditùkù adi, mu cimwè cyà ku bibèjibeji mu mwaba kampànda ne, cipidì cyà difwà dyà mabàkà cyà mu Àmèrikè nцитùmбùке kutàmba cyà ditungà dikwàbò kanà dyònsò pa buloba. Kàdi pèètù's mbimanya ne tudi ditungà dyà batèndeleeedi. Èyowà's, ncifwànyine kwikala nànkù, ntèndeleeu, èyo, kàdi kî ngwa mùshindù mujaalàme to. Nwamònu anyi? Ntèndeleeu ùdi ànu cibwikilu cyanaàna. Mbikolè bwà kwamba citùdi twenza naaci cibwikilu cyètù. Adàmà wàkateeta kudyènzelaçi ne mabèji à mfigi, kàdi kacýàkakùmbanakù to. Cyàkalwa citànkàkàne pààkakèngelàbi bwà kupàtukayè bwà kutwilangana ne Nzambi. Pa nànkù ntèndeleeu kî ngudi ucikumbaja cyònsò aci to. Kàdi nudikù bafwànyine kwela meeji ne cyètù cipidì twètù cyà difwà dyà mabàkà, citùmбùке kutàmba—kutàmba cyà matungà makwàbò ónsò, cyètù cipidì twètù cyà difwà dyà mabàkà? Tudi tusangana nsòmbelu wa masandi wènda ùbaànda mu mèkù ètù.

⁶² Bìvwa byà bikèmeshangana bikolè pa kujandula, ne, byà pa lukàmà byàbùngi pa mmwènenenu mucinka wa ditungà, ne mu. . . ngeela meeji ne mùvwa mmu Ohio, mùvwà dikenketa adi dyenjìlbwè dyà wena Kilistò, ne bìvwa byà bìkwàcishangana bwòwà bwà bùngi bwà byà pa lukàmà byà bàvwà kabàyikù nànsha bàya mu èkèleeziyà to. Ne pashiishe, pàmwè ne byà pa lukàmà makùmi mwandamukùlù à biinè bàvwà bàya mu èkèleeziyà abu, kabàvwà bamanyè ne bàvwà bàyamù bwà cinyi to. Kî mbamanyè ne bàyaayamù bwà cinyi to. Bàyaaya mu èkèleeziyà pààbò ànu nànkù.

“Wèwè uyàayamù bwà cinyi?”

⁶³ “Èè, mààmù's uvwa ùyamù neetù patùcìvwà bânà, ki pèètù kushààla batungùnùke ànu ne kuyamù.” Ne—ne pashiishe, mpindyewu, byà pa lukàmà bikwàbò byà bôbò abu, bàvwà bàmba ne bàvwà bàyamù ànu, kaa, bwà katwilanganakù ne beena mutumba naabò bwà kuyikilanganabo kwòkò ndambù. Nwamònu anyi?

⁶⁴ Mòna's, s'mbya bikwàcisha bwòwà's! Kabyèna bikèmeshakù to mùkaadi nsòmbelu wa mu dîkù mufwè, nwamònu's, nsòmbelu kanà yònsò wa mu dîkù utukù kàyi mushindàme kaaba kàmwe ewu.

⁶⁵ Mukàji yònsò udi uswa bwà kusèdiibwa kùdi mulùme, kadi kàyi mutwishiibwe bwà mulùme awu to, mbìmpè àlekelè mulùme awu ku maci tàlàlà. Ne mulùme yònsò udi uswa bwà kusèla mukàji, kàdi kàyi mutwishiibwe to, mbìmpè ùlekelè mukàji awu ku maci tàlàlà. Mbìmpè ùsambilè mufwilekù, pa bwalu abu, too ne pàdi Nzambi ùkupèèsha dyandamuna. Ne dîbà adi cidì Nzambi ùtèeka pàmwè muntu nànsha umwe kàcipandùlùlù nànsha. Kàdi twètù—twètù, dyàmbedi, tudi ne cyà kusambidilamu, pa cyòci aci. Èyowà.

⁶⁶ Mpindyewu, tudi tujandula ne tudi bateetè bwà kukùdimwisha bàà pa buloba mucimà ku ndongamu wa bulongeshanganyi, ne ncyà bushùwà ne tudi bacivwijè bukooyà, cyà bushùwà menemene. Kwèna mwa kukùdimwisha bàà pa buloba mucimà kùdì Kilistò ku dibàlongesha dyà tùlaasà to. Dimulongesha dyà kàlaasà didi diya nendè kule ne Nzambi, kutàmba mùdidi dimukoka pabwìpì ne Nzambi, bwalu ùdì ùteeta kwela meeji ne yèyè ùtu ne meeji matwè ne mmumanye kutàmba muntu kampànda mukwàbo. Nànsha mùdì dilonga dyà tùlaasà dîmpè, Kilistò kàakatùmakù èkèleeziyà Wendè bwà kulongesha bàà pa buloba tùlaasà to. Kacya Yèyè kààkabàlongeshakù tùlaasà to, bwà kwenza ma-sèminèrè. Kacya Yèyè kààkabàlongesh-. . . Kaa, yôyi's mmîmpè. Kacya Kààkabàmbilakù bwà kuyabò kiibaka mpitaadi to. Byònsò abi bìdì ànu bìmpè.

⁶⁷ Kàdì mudimu wa Èkèleeziyà ngwà kuyiisha Èvànjeeliyò. “Ndàayi pa buloba bujimà, nùkayiishè cifùkùibwà cyònsò Èvànjeeliyò.” Nwamònu anyi? Kàdì cyònsò cidi cishiilàngàne ne aci, cidi cilwa citànkàkàne, bwalu cidi pambèlù pàà ndongamu wa Nzambi.

⁶⁸ Nsòmbelu wa ditùnga mmulubidile. Èè, maalu a pa buloba mmalubidile. Tudi ne mwoyi ànu mu mwaba wà ne buloba bujimà bùdì ne dìsaamà dyà mutù, byenzè ànu bu ne, byònsò nditànkakana pa dyòdì. Ditùngà ne ditùngà dyònsò, bantu bònsò, ewu ùciina mukwàbò. Bàdì bàmbilangana ditalala.

⁶⁹ Bàvwa, musangu kampànda, bàmba ne: “Kàa, patwàlwanganà Mvità yà Kumpàlà yà Buloba bujimà, apu bàna bèètù bàà nsongààlùmè nebiikalè ne cyà kuyakù, aci ncyàjikijà bwalu bwà mvità ayi.” Mòna's, kabàvwaku nànsha banji kupeepa mwìshì wà byà mvità baumùsha mu lupeepèle to ki kudyèlabo mu mvità mikwàbo.

⁷⁰ Pashiishe kwenzabò Nsangilu wa Matùnga, ne aci ncivwà mwà kwikala mpùlushi wa bàà pa buloba, kàdì kupangilaci bwalu's. Mpindyewu bàdì ne O.N.U., ne cidi ncintu ànu cimwècimwè aci. Ncipangilè bwalu's. Kacyèna ne bwà nsongo nànsha.

⁷¹ Byònsò mbyà bitànkakana; nsòmbelu wa ditùnga, nsòmbelu wa cidiidì, byamù bya dyenza naabi masungulangana. Kàa, èkèlekèle! Bàdì ànu. . . Cintu cyònsò mu kaabujimà's ncinyukushiibwe's, bintu byònsò.

⁷² Mpindyewu ndi muswè kuciseemejakù ndambù kwètù kumbèlu. Nwamònu anyi? Nsòmbelu wa èkèleeziyà mmunyùkùshiibwe ne mulubidile. Mpindyewu, ki civwà Pòlò wàmba ncyòci aci. Nwamònu anyi? Ki mwaba awu wùvwàye ùswa kwamba ne: “Piikalà mpungi upátula mwadi mulubidile.” Nsòmbelu wa èkèleeziyà mmunyùkùshiibwe. Bantu kí mbamanyè ciinè cyà dyenza to. Bàdì bàya, bálalakana ku

èkèleeziyà ne ku èkèleeziyà, bàteeta bwà kujandula ne ngwèpì udi ne cintu cyà bushùwà; bàatwa eku bàatwa kwaka, bàteeta bwà kujandula ne ngwèpì udi wa bushùwà, dilongesha dijaalame didi penyì. Nènku muntu nealwe mwaba awu, ne mwikàle mwà kucyùmwiya, wamba kufika menemene ne pa twitabàayi wabò ne, ki cyà bushùwà. Ne pashiishe, katanci aka, basangana bintu binyangùke búngì cyanààna mu cyòci aci, mu mùshindù wà bàteeta èkèleeziyà mukwàbò, bwà kumòna ne twitabàayi wabò ùdi cinyì, dilongesha. Kaa, byònsò ebi, tudi tujandula ne tudi bakòsòlòke twètù biinè díbà adi, ku bintu ebi, too ne ku nkàmà ya méyì matùma mashìilèshìilàngàne à èkèleeziyà. Mpindyewu, katwèna naaci cilumbù to. Aci cìdi ànu bwà bààmònakù mwà kwenza bikwàbò bintu abi, díbà adi ne, bàdi bènza cyà bushùwà, ne bikèngela mùpatukèku cyà cìmpè mu cyòci aci, mwaba kampànda.

⁷³ Kàdi, nudi numòna's, kwèna mwà kutèèkamù dyeyemena dyèbè mu kwamba ne: "Mémè ndi wa mu nsangilu wa maèkèleeziyà wa ba-Méthodistes, ne ndi—ndi bímpè bwalu ndi wa mu cyòci aci." "Mémè—mémè—mémè ndi wa mu nsangilu wa ba-Baptistes, ne ndi bímpè." Kwèna mwà kwenza nàнку to.

⁷⁴ Kwèna nànsha mwà kucyènza to paùdi wamba ne udi "wa mu nsangilu wa èkèleeziyà wa beena Mpenta." Kwèna mwà kwenza nàнку to. Kwèna ne cyà kwenza nàнку to, bwalu kí ncyòci aci to. Tudi tujandula ne pàvwà nsangilu wetù wa kumpàla wa Mpenta, Nsangilu wa Bònsò awu, pàakatèèkiibwàye mu bulongàme, kacýàkanènga kabàyi babangè kutàpuluka buumuka mwómò amu, kutàpuluka buumuka mwómò emu, ne tulumbùlumbù twà bakòkangana, ne malongesha. Kàdi mpindyewu cìtàngìlaayi ànu cyanààna, myaba yònsò. Nwamònu anyì? Bìdi bìleeja ne mbilubidìle. Abu bàdi bèeyemena ànu bulongolodi nkààyaabù abu, mbu—mbulubidìle's.

⁷⁵ Mpindyewu, wèwè udi mufwànyine kwamba ne: "Mwanèètù Branham, wèwè udi utùlalula uya neetù kwà nàka mwab'ewu. Wèwè udi uzòla cimfwànyì cifiikè cyà menemene." Ne mémè mwinè's ki cìmvwà ne meeji à kwenza. Ncìmvwà muswè kwenza.

⁷⁶ Ndi mucyènzè mu kiipàcilà, mbwà ngaamòna mwà kwamba eci nùнку. Kùdikù cintu cyà citwishìibwe anyì? Èyowà. Kùdi cintu cìmwèpelè cìdi cyà citwishìibwe. Kaa, ndi ne disànka be bwà bwalu abu, dyà ne kùdi cintu cìmwèpelè cyùdiku mwà kutèèkela dyeyemena dyèbè, ne kwikalakù mutwishìibwe ne ncyà bushùwà. Kaa, piikalà bintu bikwàbò byònsò bijikè, *Eci* ncyàshàlàlà ciimàne tèndee. Bu nwènù mwà kubala Maatàayi Munsantu 24:35, Yèyè mmwambè ne: "Maulu ne buloba nebìjiminè, kàdi Dìyì Dyànyì kadyàkupangilakù to." Nzambì ngudi ne cishimikidi kampànda cyà citwishìibwe.

77 Mukùlumpè kampànda, wàkamba musangu kampànda, mukùlumpè wa bafiike mu Sud mwàmwa. Ùvwa mwambùle Bible, kàdi kàyì mumanyè mwà kubala to. Ki kwambabò ne: “Udi wenda nendè mumwambùle bwà cinyì, Sam?”

78 Yèyè ne: “S—s’m’Bible Munsantu.” Yèyè ne: “Mmùdìbo bafùndepù.” Ki yèyè ne: “Ndi muMwitàbùùje, kubangila ku cizubu too ne ku cizubu, ne ngiitabuuja ne cizubu aci kàbìdi,” mwàkambàye, “bwalu cidi ne ‘Bible Munsantu’ mufùndaPù.”

79 Ki muntu uvwa wakula nendè awu, kwambayè ne: “Kwèna witabuuja byònsò bìdìMu to?”

Yèyè ne: “Èyowà’s, mukalenge. Ncyà bushùwà ne ndi ngiitabuuja.”

80 Yèyè ne: “Mpindyewu, èè, udi uswa kwamba ne udi mufwànyine kwenza cintu kanà cyònsò cidi Bible mwambè bwà kwenza anyì?”

Yèyè ne: “Èyowà’s, mukalenge.”

81 Yèyè ne: “Kàdi bu Bible awu mwambè bwà Sam kutùpika kupìcilayè mu cimanu cyà mabwe *cyàcyà*? Cyùdì mufwànyine kwenza ncinyì?”

Yèyè ne: “S’ndi mufwànyine kutùpika.”

82 Awu ne: “Èè, mpindyewu, mmunyi muwàpìcilà mu cimanu cyà mabwe kamùyì disòsò?”

83 Yèyè ne: “Pìikalàbi ne Bible ngudi mwambè ne Sam àtupikè, nkufwànyine kwenzeka disòsò muntwamu pààfikàpò Sam.” Pa nànkù, aci, cidi ànu bu ne mmùdici. Nkufwànyine kwenzekamù disòsò.

84 Cintu cìmwèpelè cidi cikèngelà wèwè kwenza nkwymanyina pa Dìyì dyà Nzambì, nènku Nzambì neàpengè njila bwà bikwàbò bìdì bishààla abi. Kaa, cishìmikidi cinène aci.

85 Ngeela meeji ne Yèyè mmwambè, mu Luukà mwàmwa, ngeela meeji ne mùvwa mwòmò amu, pàvwàbo bàtùùluka ku mukùnà apu, KwambilaYè bayiidi ne: “Bantu bàdi bàmba ne Mémè Mwànà wa muntu ewu Ndi Nganyì?”

Ki umwe kwambayè ne: “‘Yelèmiyà,’ ne ‘bapròfetà,’ ne bikwàbò.”

Ki Yèyè ne: “Kàdi nwènù nudi nwamba ne Ndi Nganyì?”

86 Ki pààkambà Peetèlò dīyì dyà mushinga mukolè adi ne: “Wèwè udi Kilistò, Mwànà wa Nzambì udi ne mwoyi.”

87 Yèyè ne: “Udi mubènèshìibwe, Simonà, mwànà wa Yona, bwalu kī mmusunya ne mashi bìdì bikubuulwile eci to. Kàdi Taatù Wanyì udi mu Dyulu ngudi mukubuulwileci. Nènku pa lubwebwe elu Nèngiibakilèpu Èkèleeziyà Wanyì, ne biibi byà ifèrnò kabyàkuMutàmba bukolè to.”

⁸⁸ Ncinyi aci dîbà adi? Pa bulelèlè bubuulula bwà Dîyi dyà Nzambi. Bwalu: “Ku cibangidilu kwàkadi Dîyi, ne Dîyi dyàkadi ne Nzambi, ne Dîyi dyàkadi Nzambi. Ne Dîyi dyàkavwijiibwa mubidi ne dyàkasombela munkaci mwètù.” Ne cyàkabuuludiibwa kùdi Peetèlò ne civwa n’Dîyi dishindikà dyà Nzambi. Amen.

⁸⁹ Ki bwà cinyi Yèyè ùvwa mwà kwamba ne: “Nganyi udi mwà kuMpiisha bwà mpèkaatù? Nganyi udi mwà kuMpiisha? Cyònsò cidi Dîyi difunde bwànyi Mémè aci, s’Ndi mucyènzè.” Nzambi ùvwa mucishindikè ne, Yèyè nguvwa Dîyi. Kaa, ki cyòci aci’s. Nzambi mmumwènèshe, Dîyi didi dyamba nànkù, ne pashiishe Nzambi ùcivwija cilelèlè, ùcifikisha ku dyanzeka, ùcileeja.

⁹⁰ Kùkaadi bidimu, pàakambilàbò èkèleeziyà ne: “Cintu pàaci ne ndibàtiiza dyà Nyumà Mwímpè kacitukù to, s’cidi ànu disaluka cyanààna òvwa bantu bàsaluka,” kadi aba bààkaMupetà abu, bàvwa bamanyè ne civwa bulelèlè. Bàvwa bamanyè ne Nzambi ùvwa wa cyà bushùwà. Ne bikaadi bijaadikiibwe, mu mùshindù wà ne, leelù ewu, nkwaka wa beena Mpenta wa Nzambi mu matungà ònsò, mmubweje bantu bààbùngi mu Kilistò kutàmba bakwàbò bònsò.

⁹¹ *Mutùkùmbugi Wetù Wa Dyàlumingu*, ànu àbidi àdi panshi aa, cibèjibeji cyà beena Kàtòlikè, ncyambè; ngeela meeji ne civwa ncidimu cyà kumpalà kwà cyàshàadi eci, anyi cidimu cishàale, cimwè cyà kùdibi; ne: “Èkèleeziyà wa Kàtòlikè mmupetè ànu cyàbibiidi cimwè cyà mùliyò wà bàdi bakùdimène mucima. Pàvwa , beena Mpenta bapetè mùliyò mujimà, binunu nkàmà yitaanu.” Amen.

⁹² Ncinyi aci? Ncintu cyà cyènda cibànda’s, Dîyi dyà Nzambi, ditangalaka too ne ku baabèndè. Mùshindù mwinè wùvwàbi bikèngela bwà twètù kwikala ne kusàkidila’s wè! Mbààbùngi menemene, mu mùshindù wà ne, nànsha mene mpindyewu ba-Épiscopaliens, ba-Presbytériens, ba-Luthériens, ne bònsò, bàdi munkaci mwà kulwa bwà kuCyàngata ndambù. Nudi numòna mu masangisha à Beena Kantu-ku-byanza, nudi nubumvwa bààkula bwà bantu bashiilèshiilàngane: ba-Épiscopaliens, ba-Luthériens, ba-Presbytériens. Mòna’s, nku mpùukàpùukà menemene kunùtù nuumvwa mwena Mpenta mwenzakù kabidi cintu. Ncyà bushùwà’s. Mbakwàbò bònsò abu. Mbwà cinyi? Bàmònu butekètè bwàbò bwà twitabàayi yàbò, nènku bálükidi ku Dîyi. Apu ki panùdi nupeta cishimikidi, cintu kampànda cidi kaciyi mwà kunyungishiibwakù to.

⁹³ Jandùlaayi mwómò amu, Nyumà Mwímpè mwikàdila ne Mwoyi Wèndè munda mwà bantu, ùDimwènèsha kùdi bàà pa buloba. Nènku cidi cipèèsha bantu nyòòtà Yèndè: kadiyi kunyùkusha, kadiyi kwelangana naadi mpatà, Dîyi dyà Nzambi mumwènèshiibwe ne ùDileeja, Dîyi Dyòdi diinè ditèkiibwe mu nsòmbelu wa buntu. Cintu bulenga kaayipu’s wè! Kakwèna

kantu nànsha kàmwè kàà kalubidile pa bwalu abu to. Nudi mwà kumòna mwaba wùdì Nzambi mufile mulayi, ne ki wówò ewu mumwènèshìibwe. Kùkaadi nkàmà yà bidimu kùvwà bapròfetà baakùlepù, nènku's ki twètù aba tucimòna cyènzeka.

⁹⁴ Byònsò bipicile mu didyudiibwa, byònsò bipicile mu tulumbùlumbù, byònsò bipicile mu twitabàayi, mùshindù mwinè wùkaadibo bateetètèete bwà kudyatakaja Dìyi dyà Nzambi's wè! Mùshindù mwinè wùkaadibo bateetètèete bwà kupingajapù dilonga dyà tulaasà. Mbateetètèete bwà kupingajapù, kwenza dngumba. Mbadibwejè bóbò biinè mu cibwejàkàjì. Kàdi mu byònsò abi, Dìyi dyà Nzambi ndishàale ànu kacya diimana diikàle dibàlakana ne dikenka ànu mwàdi ne kale. Ncinyi aci? Ncintu cidì citwishìibwe aci. Nzambi wákamba ne: “Maulu ne buloba byònsò bìbìdì nebìjiminè, kàdi Dìyi Dyànyi kadyàkupangila to.” Dìbà adi, ki cintu cidì citwishìibwe aci's. Wèwè muswè kudyèla wèwè mwinè lwongò, elèshà Dìyi adi lwongò mu mwoyi wèbè.

⁹⁵ Davidi wákamba ne yèyè ùvwà muDìsokòke mu mwoyi wèndè, bwà kènji mpèkaatù to. Wákafùnda mikenji Yèndè ku dikunji dyà bulààlù, ne kuyiswika ku byanza byèndè ne mu myaba yònsò, kutèeka Dìyi Dyèndè misangu yònsò kumpalà kwèndè. Ki mùshindù ngwówò awu. Lamàayi meeji ènù dìbà dyònsò . . .

⁹⁶ Nzambi wákambila Yoshùwà ne: “Kùcyùnguluki nì nku dyàbalùme nì nku dyàbakàjì, umuka ku Dyòdi to. Dìbà adi neùtancishè njila yèbè. Dìbà adi's neùtuutè dyàkalenga.”

⁹⁷ Nènku pààdisangà èkèleeziyà yèyè yònsò kule ne twitabàayi yèndè, ne pa Dìyi dyà Nzambi, dìbà adi èkèleeziyà neàtuutè dyàkalenga. Ki cintu cyàvingà communisme ncyòci aci.

⁹⁸ Cyàkenzà communisme ncinyi . . .? Cintu ciinè, cinùdi nwènù nudyàmbidila ne “communisme,” pàdiye ùtangalaja dilàkà dyàbo dyà mukana, ne bàvulangana bibànde cipidì, ku miliyò, kàdi bantu ne bwòwà bwàci: communisme awu neàfubidilè ne neàfwe. Ùdi ne cyà kufwà. Communisme, bàdi mwà kwenza *cikampànda*. Mbafwànyine kwenza *cikansanga*. Mémè ndi ngiitabuuja ne Nzambi neàkwatè nendè mudimu, kàdi, aci ncyà bushùwà, ànu mwàkenzàYe ne Nebùkàndènèèsà amu. Neyimansha, lu—lu—lu . . . lupèlè lwònsò, pambèlu, ne communisme. Kàdi, aci . . . To, twànji kwimanyina apu bwà aci. Kàdi, tàngilàayi. Kàdi cintu aci, communisme awu, neikalè ne ndekeelu. Communisme neàfikè ku ndekeelu wèndè.

⁹⁹ Kàdi Dìyi dyà Nzambi kadyèna ne ndekeelu to, bwalu Dyòdi kadìvwà ne ntwàdijilu to. Amen. Ndyà Cyèndèlèlèlè pàmwè ne Nzambi. Nènku wèwè mwelè lwongò, ne Dìyi dyèlè lwongò munda mwèbè, wèwè udi wa Cyèndèlèlèlè pàmwè ne Dìyi adi. Amen.

100 Bidi ne cyà kufika ku ndekeelu wabi. Bintu byònsò abi mbyà bitankakana. Nànsha bóbò biibaka dikunji dyà bunène bishi, didi ne cyà kudishinda. Bintu byònsò bìdi kabiyi byà, bìdi bibèngàngàne ne Díyi adi, anyi bibèngàngàne naadi, nebiiikalè ne cyà kuumuka. Nebiiikalè ne cyà kushiya mwaba, bwalu Díyi dilwalwa ne bucimunyi bwònsò. Kakwèna cidi mwà kuDiimanyika to. Nzambi ngukààdi mumanè kwamba nàнку.

101 PàdiYe ùDyàmba, maulu ne buloba nebijiminè, kadi Dyòdi kadyàdyàkupangilakù to. Sokòkà Díyi adi munda mwà mwoyi wèbè, mwà kwangata Díyi adi ne kuDilekela dikola. Dilamè mu meeji èbè, misangu yònsò, bwalu kaDyàdyàkupangilakù to. Díyi dyà Nzambi kadyàdyàkupangilakù to, bwalu Yèyè mmwambè ne kaDivwa mwà kupangila to. Pa nàнку tudi baswè kucilama pa aci nàнку.

102 Mpindyewu, Pólò mmwambè, mu Mifundu amu, byenzè mùtù kulongesha kwà disàlaayi, disàlaayi ku mwadi kampànda. Mpindyewu, bitu bikèngela bwà disàlaayi kulongadi myadi yà wendè. . .yà mpandalala anyi yà mpungi. Yèyè kí mmumanyè mpungi ní ùyaaya, ní ùdi ùdila, anyi bwà—bwà kubùndulangana anyi bwà kwalukila cyànyimà mu mvità. Yèyè kàyi mumanyè dishiilangana to, ncilwilu cyà cibwejàkàji cyà mùshindù kaayi cinùdi bafwànyine kwikala naaci aci? Mwena lukùna's muufwànyine cyà bushùwà kucimuna musumbà wà màsàlaayi àvwà kaayi malongeshiibwe bilenga kutàmba aci abu. Amen.

103 Ki lutàtù lùdi naalù èkèleeziyà yètù leelù ewu alu. Tudi babàlongeshile pa twitabàayi, bashiilàngàne muntu ne mukwèndè.

104 Bidi bikèngela twikalè badyènzè cimùkù. Bikèngela twikalè bamanyè mpungi. “Nènku mpungi awu ngwepi?” mùdìbo bàmba. Mpungi wa Èvànjeeliyò, ki Yèyè. Díyi dyà Nzambi udi ne mwoyi didi m'Mpungi. KanùMusambàkàji ne cintu nànsha cimwè to.

105 Kanwàmbidi muntu bwà kwimbayè lùnkòmbè lwà ba-Français, ne mukwàbò yèyè ùdidisha mwadi wà mpandalala awu to. Muntu nànsha umwe kèna ùmanya cyà dyenza to. Cidi citwàla cibwejàkàji.

106 Nènku Pólò ùvwa wàkula bwà kwibidija muntu ku mwadi wà mpungi. Nènku ànu mùdi mwadi awu amu, yèyè mmumanyè menemene ànu cyà dyenza, bwalu mwedi wa mpandalala mmupetè mèyi matùma, à kùdi kàpìteenà munène. Nènku pàdiye weèla mpungi ewu apu, cilwilu cidi cìmanya ànu menemene mwaba wà—wà kusemenena, ne mwaba wà kwalukidila cyànyimà, anyi bwà kukùdimukila ku dyàbalume anyi ku dyàbakàji, anyi cidi cikèngelà kwenza, ku dyela dyà mpungi adi.

107 Mpindyewu, cilwilu, mvità, citu misangu yònsò ànu mvità. Twètù katùtukù bayè kashàala bàà mu Èkèleeziyà, anyi

bakabwelè mu Èkèleeziyà, bwà kulwa ku didyà dyà pikiniki to. Tudi ne cyà kumanya ne kutùdi tulwa nku mwalu wà mvità.

¹⁰⁸ Kaacya, neitukù ndwa bwà bantu kwikalabò bàntuuta tuumapì paanyimà bàmba ne: “Mwanèètù Branham, wèwè udi muntu mulenga wa dikèma to.” To, mukalenge. Ntu ndwa kuntwaku mwambùle ngabu. Ncyèna dijinga ne ngabu bwà byà nàнку to. Ntu ndwa mwasè cifulu cyà mvità mwambùle byà mvità. Ntu ndwa bwà kulwangana mvità, kulwangana bwà katùpà kònsò kàà buloba.

¹⁰⁹ Nzambi wàkambila Yoshùwà ne: “Mwaba wònsò wùdi bidyaci lu byèbè byà makàsà bidyata, Ngàakupèeshiwù.” Pa nàнку, bidyaci lu byà makàsà bivwa byùmvwija ne ncintu cyèbè.

¹¹⁰ Nènku pàdi ànu èkèleeziyà ùfika pa kaaba kampànda, kàà ùdya cibàngà ne twitabàayi, ne ùdya cibàngà pa bìdi bìtàngilà Dìyì, ne ùdya cibàngà ne maalu à pa buloba, ndi muswè kwamba ne, dìbà adi ùdi ùjìmija buloba. Ùdi wàlukila cyànyimà.

¹¹¹ Cidì citùkèngelà dilòlò edi mmàsàlaayi bwà kukwàta mulayi wònsò wà Nzambi wà Bible ewu, wùdi Nzambi mulayè Èkèleeziyà awu, byà mvità byònsò byà Nzambi, kàdi kwimana. Ki cidì citùkèngelà, màsàlaayi; kì nkupeta bilàmbà byà kùmwekùmwe bu bivwàlù byà lwendu lwà mìdòlòlooci to, bitu misangu yònsò ànu bishìilàngàne. Pàdi muntu. . .

¹¹² Ditùngà kanà dyònsò edi, tutu ne batentekedi mu ditùngà ne ditùngà dyònsò. Tudi ne batentekedi bàà beena Àlèmanyè mùneemu emu. Tudi ne batentekedi bàà Ànglètèrè mùneemu emu. Tutu ne—tutu ne batentekedi mu Ànglètèrè. Cidìbo bàteeta kwenza ncinyi? Bàdi bàteeta kujandula ne mbyamù byà mùshindù kaayi, mbòmbè bwà mùshindù kaayi, bùdi naabò mukwàbò awu. F.B.I. ùdi pabwìpi menemene ne ditùngà dyònsò. Bàdi bàtàngila, bwà kumòna. Ki mùdìbo bàpànduka nàнку. Bàdi bàtàngila bàmòna ne mbòmbè bwà mùshindù kaayi bùdi mukwàbò awu naabò. Dìbà adi bàdi bàlwa ne bènza cyà citàmbe bwìmpè ndambù, anyi bènza cintu kampànda bwà kucìlwisha. Kabèèna bèyemenangana muntu ne mukwèndè to, mu matùngà, bwalu aci cidì cileeja ne matùngà àdi munkaci mwà kuzakala. Mona’s, Ànglètèrè’s mmufwànyine kutùtaayisha, mu dìbà dimwè, bu twètù mwà kusambuka mukalù wàabo, anyi twètù tudi bafwànyine kubataayisha bòbò. Bìdi bìkèngela ànu bwà muntu udi kumutù kwà cintu aci awu, ànwekù ànu twalà tukesè nàka, tupite búngì, anyi àfiikè ànu munda bwà bwalu kampànda, dìbà adi cyumba ciya’s.

¹¹³ Mùneemu emu àbìdi àdi pànshì aa, bàvwa bàmba, kantu kakesè kafùnda ne: “Kenzela mu Japon,” mu cikondo cyà mvità amu. Bàvwa mwà kukàkùpa pànshì, bààsa lwendu bàya, bàleeja dinanga dyà ditùngà dyàbò. Kàdi patùdi twakulangana apa neùcifucilè mushinga munène kutàmba nì ncinyi cyònsò cyùdi usùmba mu ditùngà. Cidì cyenzèke ncinyi? Aci cidì cifuta myoyi

yà nsongààlùmè yàkafwà kuntu kwàka ayi anyi? Ncyà bushùwà ne kí nnànkú to.

114 Ncinyi aci? Nànsha wèwè ulwangana mvità bishi mu bintu byà mubidi, neùye, kabyàkwikala ne musinga nànsha mukese to. Necinyukukè. Kàdi kùdi mvità yimwèpelè yùdi mwà kubwela ne kupetakù malaba àdìbo kabàyi mwà kukunyenga to. Ki mwadi wà Èvànjeeliyò wà Mpungì wa Dìyì dyà Nzambì awu's, ne ùdi ne mapà ne milayi yidiYe mupèeshe Èkèleeziyà. Ndyòdi cyà bushùwà. Mpindyewu, tudi tusangana—tudi tusangana, tufila mwadi wà mpungi ewu.

115 Mpindyewu, ditùngà ne ditùngà dyònsò didi diteeta bwà kupèesha nsongààlùmè yàdi byà mvità byà ngabu yà mitàmbe bwìmpè yidìbo mwà kwikalakù naayi. Mpindyewu, ndi mumanyè ne, misangu mikwàbò byà mvità ebi kabitu bipeepèlè byà kwenda naabì byambùla to.

116 Mvwakù ne mwanèètù wa balùme kampànda, “Rookie,” mùvwàbo bàmbùkila, ùpàtuka mwab'ewu, ne cilwilu cidi cìmupèesha bujitu bwà kilò makùmi ànaayi bwà dyambulayè paanyimà. Ne aci's mpàmwè ne bujitu bwèndè. Bàdi bàmbupèesha cikàsu, cyà kuumbula naaci bwinà; cingoma, ne mushiki mujimà wà grènàdè yà ku byanza. Nènku, kaa, kacya ncitukù mwanjì kumòna bujitu bwà dyambula bwà mùshindù awu to! Mukwàcìkwètù awu kàvwa mufwànyìnekù kwenda to. Ne bàvwa bàya nendè mu njila ntàntà wa kilomèètà mwandamukùlù wa lwendu lwà makàsà. Byamba kumushipa's. Yèyè ne: “Macimbu miinè aa ngàà cinyi? Cifulu cinènè cyà mvità cyà kale eci ncyà mudimu kaayi kùndi's?” Mpindyewu, tàngilàayi. Cilwilu ncimanyè ne yèyè neikalè naaci dijinga musangu kampànda. “Cikàsù ncyà mudimu kaayi, mu cibeeba emu, ngenda ngenda?” Mbìmpè wèwè kwikala mudìbidije ne dikwàta naaci mudimu. Udi mufwànyìne kwikala naaci dijinga.

117 Bukalenge kabwàkupàtula cintu kampànda nànsha cìmwè paùdi kùyi mumanyè. . . padìbo kabàyi bamanyè ne nebikukengele bwà kwàta naaci mudimu to. Wèwè udi ne cyà kudiibidija naaci. Bòbò bàdi bàpeta bintu bitàmbe bwìmpè bidìbo mwà kupeta, bwà kukuba naabì wèwè, bwalu bàdi bùmvwà bwalu bwà ditùngà bùbàtwa ku mwoyi. Cidi cìbàtwa ku mwoyi bwèbè wèwè mbwà wèwè kwikala mukubiibwe ne mwèbè mwònsò, kule ne màzajì. Ki cìtùku misangu yònsò.

118 Cyàkabanga mu budimi bwà Edènà. Ne Nzambì ùdi wibìdija Èkèleeziyà Wendè. Ne . . .

119 Nudi bamanyè's, bitu bikèngela misangu yònsò ànu twètù kulengeja. Mpindyewu, ndèkè yà kale yitùvwà tukwata naayi mudimu kale wàwà mu Mvità yà Kumpàlà yà Buloba bujimà ayi; Mvità Miibìdi yà Buloba bujimà, mòna's, tundèkè tukesè twà mutooyi mukole mu mpeepèlè atu katùcìvwakù to, pààkenzàbo ndèkè minène milenga yà mitàmbidile yivwàbo naayi eyi.

Mòna's, ayi kayìvwa cintu to. Kàdi mpindyewu, yìvwàbo bafùme ku dikwàta naanyi mudimu mu mvità yà ndekeelu eyi, patùdi twakulangana apa's yikaadi mipicile matùkù. Kabàcyèna kabìdi naayi dijinga to. Bàkaadi ne tundèkè twà jets. Ne, nwamònu's, nudi nuteeta ànu kulengeja, kulengeja cintu aci bwà didilama.

¹²⁰ Kàdi nudi bamanyè mùdi bwalu anyi? Kabyèna bikèngela bwà Nzambi kulengejaYè to. Nzambi wàkapà bânà Bèndè, mäsàlaayi Èndè awu, cintu ciinè cyà citàmbe bwìmpè cìvwà mwà kubàpèèsha aci. PàakabàpèèshàYe, cyàkabàpèèshàYe ncinyi? Wàkabàpèèsha Dìyi Dyèndè mu budimi bwà Edènà, ne bìvwa bikèngela bwà muntu kudyèlayè yèyè mwinè mu bimanu paanyimà pàà Dìyi dyà Nzambi, ne démon nànsha umwe kèna mwà kumupeta to. Shààlaayi mu Dìyi.

¹²¹ Mpindyewu, mwena lukunà ùdi ùtentekela, Sàtaanà, wàkateeta bwà kujandula cìvwàye mwà kwenza bwà kubwelayèmu. Pa nàнку yèyè—yèyè ùvwa mumanyè ne kàvwa ànu mwà kupàtuka ne kwenzela mukàji awu mikaaka to, pa nàнку cintu cìmwèpelè cìvwàye mwà kwenza cìvwa nkumufikisha ku dilukakaja dyà lungènyi. Nènku ki cidì Nzambi ùkwàta naaci mudimu leelù ewu, bwà kwela Èkèleeziyà Wendè mu bimanu, n'Dìyi Dyèndè. Kàdi Sàtaanà ùdi ùlwa ne bukolè bwà dilukakaja dyà lungènyi. Sàtaanà ùvwa mumanyè ne aci cìvwa pàà kudifindila. Mmwaba wùvwa bantu bafwànyine kukòsokela byà bitàmbe bipeepèle, nku dilukakaja dyà lungènyi.

¹²² Wèwè udi wamba ne: “Mpindyewu, lekèlè ngànji ndukakajèku neebè lungènyi. Mpindyewu bìdi ne mushinga anyi?”

¹²³ Bu ne Nzambi mmwambè ne bìvwa ne mushinga, bìdi ne mushinga, nànsha byòbì bikèngela bwà twètù kudila, ne kuboobola cibòòbò cyà mwadi, ne kwenza *bikampànda* byònsò abi. Pìikalàbi ne Nzambi mmwambè ne dibàtiiza dyà Nyumà Mwìmpè didi ne mushinga, nànsha Diikàle ne bujitu bwà bìshi, ne bùngì bwà maalu à pa buloba bùdi bùkèngelà bwà wèwè kulekela, nebikengelè bwà wèwè kukwàta naaDi mudimu, òmwè dyà ku matùkù àdi panshì aa, bwà kushààla ne mwoyi. Mùshindù wùmwepelè wà dipànduka.

¹²⁴ “Mpindyewu, bìvwa bikèngela bwà twètù kwikala twenza dyondopa dyà kùdi Nzambi, patùdi ne bangàngàbukà bàà batàmbe bwìmpè pa buloba apa anyi?”

¹²⁵ Nzambi mmunùpèèshe dyondopa dyà kùdi Nzambi bwalu mMumanyè ne bìdi bikèngela nùkwatè naadi mudimu. Yèyè mmunùpèèshe mapà à Nyumà.

¹²⁶ Nènku Sàtaanà mmwenzè ànu ùfika pabwìpì ne Evà, kubangayè kulukakaja nendè lungènyi. Mpindyewu: “Bulelèlè, bulelèlè, Nzambi kí mmufwànyinekù kwenza *cikampànda* to.”

127 Bantu bàdi bàmba leelù ewu ne: “Cintu pààci ne ny’ifernò kacitukù to.” Bààbùngì bàà kùdìbo bàdi bànwàmbila nànkù awu. Nwamònu anyì? “Kaa, ncyà bushùwà ne Nzambì kí mmufwànyìnekù kwosha bàna Bèndè to.”

128 Cyà bushùwà, Yèyè kèna wòsha bàna Bèndè to. Kàdi dyabùlù’s neòshè, bèndè yèyè. Wèwè udi mwànà wa nganyì? Kì cintu cìdi cilondà ncyôci aci. Ifernò wàkafùkiibwa mbwà dyabùlù ne bàna bèndè, kí mbwà bàna bàà Nzambì to. Nànsha umwe wa kùdìbo kààkuyamù to. Ncyà bushùwà. Mbilàle ku ne wèwè udi mwànà wa nganyì.

129 Mpindyewu, Nzambì wàkapèèsha Evà ne Adàmà Diyì Dyèndè, ne Yèyè kàtu muDìshintùlùlekù nànsha. Yèyè utu misangu yònsò ànu ne...Mwena Kilistò, anyì mwena kwitabuuja, wèndè Ngabu n’Diyì.

130 Maulu ne buloba nebìjiminè. Twitabàayi yònsò neàpitè. Dìngumba dyònsò nedìpangilè. Ditungà ne ditungà dyònsò neditukinè. Kàdi Diyì dyà Nzambì nedishaalè diimane, Cyèndèlèlè. Nekùlwe cikondo cìikalà mùtootò wa mu dindà kawùciyiku mwà kuteema kàbìdi to. Nekùlwe cikondo cìikalà dìbà kadiyi mwà kukenkesha to, ne ngondo kàyi mwà kukenkesha to, ne buloba kabùyi bùshààla mu cijèngù cyàbù to.

131 Kàdi Diyì dyà Nzambì nedishààle dìmwendimwè adi kashidi. Èyowà. Ncintu kampàndà cìdi kaciyi mwà kunyungishiibwakù to, cintu kampànda cyùdi mwà kutèekela mwoyi. Nditwishiibwe. Pàdi Nzambì wàmba cintu, ncyà bushùwà ne necyènzekè.

132 Pìikalàbi ne Wàkamba, mu budimi bwà Edènà, bwà Mupikudi ne, Ùvwa mwà kutùma Maasiyà awu, cìvwa cìlwa cyà bushùwà. Nànsha mwàkindilàbo bidimu binunu binaayi amu, kàdi Yèyè wàkafika kuntwaku. Ùvwa ne cyà kulwa bwalu cìvwa n’Diyì dilaya dyà Nzambì.

133 Nzambì mmulayè bwà kuMutùma cyàkàbìdi. Yèyè neikalè kaaba aka. Nànsha kujuukè beena dyabùlù ne beena mpatà bùngì kaayi, cyònsò cyènzàbo aci, nànsha communisme mutangàlaka bùngì bìshi, Yesù Kilistò nealwe, ne neàngatè Èkèleeziyà udi musukula ku Mashì, ne neàmwambwilè pa maulu too ne mu Dyulu. Bwà cinyì? Ncyà bushùwà ne nebyènzekè. Diyì dyà Nzambì ndidi dyambè nànkù.

134 “Bu wèwè mwà kwitabuuja nàka, bintu byònsò bìdi mwà kwenzeka.” Aci’s ncyà citwishiibwe. Nzambì ngudi mwambè nànkù, ne kaciyèna mwà kunyunga to, kaciyèna mwà kunyungishiibwa to. Nzambì ngudi mwambè nànkù, bu wèwè ànu mwà kushààla naaci (Mpindyewu...) ne kwikala ne diitabuuja mu cyôci, kuciitabuuja.

135 Kì mmwadi mulubidile to. Nzambì kèna mwà kupàtula mwadi mulubidile to. Twitabàayi yìdi mwà kupàtula diyì dilubidile. Màngumba àdi mwà kuyiisha diyì dilubidile. Kàdi

Nzambì kèna mwà kupatula mwadi mulubidile nànsha. Ne Dìyì edi didi Nzambì. Ne mu Dyòdi kamwèna dilubidila to. Nditwìshìbwe mu kantu ne kantu.

¹³⁶ Mpindyewu, Èkèleeziyà munène awu mmuvwadika byà mvità byà Dìyì. Mpindyewu, pàakalwà Yesù, Yèyè wàkakwàta mudimu ne byà mvità bimwèbimwè abi anyi? NcyàkenzàYe bushùwà.

¹³⁷ Pàakalwà Sàtaanà kùdiYe, mu dikàndà dyèndè dyònsò, ne kwambayè ne: “Wèwè ní udi Mwánà wa Nzambì, enzàbi bintu *kampànda*, bintu *kansanga*.”

¹³⁸ Wàkamba ne: “Bàakafùnda ne. . .” Mwalùkile buludì ku Dìyì. Sàtaanà kuMuteetaYe mubàndisha ndambù. Kàdi, Yesù, kwalùkìlayè buludì ne Dìyì ne: “Bàakafùnda ne. . .”

¹³⁹ Ki kushààlaYe mwaba awu, pa Dìyì adi, mwikàle ùtùleja bu cileejilu. MùdiYe mwambè mu Kolintò wa Kumpàla, dyàmbedi. . . Yone Munsantu 14:13 ne: “Ndi munùpèeshe cileejilu.” Nènku aci ki cileejilu, cyà ne bìvwa bikèngela twètù kwikala ne dishindika dyònsò, bìvwa bikèngela twètù kutèeka ànu menemene dyeyemena dyètù mu Dìyì dyà Nzambì. Bikwàbò byònsò bìikalè mashimi. [Katùpà kàà mukàbà wà mèyì munda mutupù—Muf.]

¹⁴⁰ Ki cintu cìmwèpelè cyà citwìshìbwe. Nzambì ngudi mufile mulayi. Nzambì neàshaale mulamàte ku mulayi awu. Bòbò bàdi bàmba ne: “Mmunyi mùdi cintu *kampànda* mwà kwenzeka? Mmunyi mùdiYe mwà kusangisha musumbà wà bantu pamwè, biikàle ne ngàsà wa Dyambwibwa, bwà kubàndabò?” Mémè ncyèna mumanyè mwàcyènzàYe to. Kì mbwalu bwànyi bwà kukonka mùdiYe ùcyènzà to. Bwànyi bwalu bùdi ànu bwà kwikala mudìlongolola ku cyòci aci. Yèyè ngudi mucìlayè. Ncyènzekè. Mmukolèshe Èkèleeziyà Wendè ku Dìyì.

¹⁴¹ Nènku cintu cyà kumpalà cìvwa ndilukakaja dyà lungènyi. Mpindyewu bòbò bàdi bàmba ne: “Ki mbyà meeji mpindyewu ne, bu mémè mwikàle wa mu èkèleeziyà *kampànda* ewu, awu kì mmwìmpè ànu mùdi èkèleeziyà *kansanga* wàwa anyi?”

¹⁴² Kùdi Èkèleeziyà ànu umwèpelè ùdi mwà kwikala wa mômò amù. Kwàdyàkashàalakù wa mu Yèyè to. Udi mufwànyine kashàala wa mu diswa adi, diswa dyà ba-Méthodistes, ne diswa dyà ba-Presbytériens, ne diswa dyà ba-Baptistes, ne diswa dyà beena Mpenta. Kàdi udi mulediibwe mu Èkèleeziyà wa Yesù Kilistò, pa nànkù ki Èkèleeziyà nyaawù.

¹⁴³ Ówò awu mmaswa, mùdi bantu bàdisangisha, bu mùtù bikòlòlò bìikila pa *edi* ditàmbà, ne nkuci pa *edi* ditàmbà, ne—ne bikwàbò. Ki bwobùmwè bwènù bunùdi nwenza pàmwè mbwòbù abu, panùdi nwabanyangana cyàkudya cìmwècìmwè aci apu.

¹⁴⁴ Kàdi pakààdìbi bikafika ku ne ki Èkèleeziyà wa Yesù Kilistò ewu, kùdi mùsèèsù ànu wùmwèpelè. N’Dilediibwa. Dilediibwa!

145 Mbyenzè ànu mùdi muntu, ànu múnkaadi mwambàmbe misangu ne misangu, mùdi nyuunyi mufiike mwikile pa ditàmbà, ùteeta bwà kudisomeka masàlà à nyuunyi wa kayiba mu èndè mapwâpwâ awu, wàmba ne: “Nudi numòna’s, mèmè ndi ngenda madyùndà ànu mùtù nyuunyi wa kayiba amu.” Nwamònu anyi? Mmudisomèke masàlà awu, yèyè mwinè. Bu yèyè mwikàle nyuunyi wa kayiba mushùwashùwàlè, ngiikàdilù wendè mmufwànyine kupàtula disàlà dyà mùshindù awu.

146 Èkèleeziyà wa Nzambi udi ne mwoyi yèyè mwikale Èkèleeziyà wa Nzambi udi ne mwoyi, s’neàpatulè Dìyì dyà Nzambi udi ne mwoyi. Kabyèna bikèngela bwà wèwè kusàkidila masàlà a nyuunyi wa kayiba mwaba nànsha wùmwe to. Ne disàlà dyònsò muntwamu nedìikalè dilamàkana ne nyuunyi wa kayiba. Udi mwà kwitabuujà aci. Ne disàlà dyònsò dìdì disàkidila mu Èkèleeziyà wa Nzambi nedìikalè Dìyì dyà Nzambi. Yèyè kààdyàkufunyikamù cingà cintu to ànu Dìyì. Amen. Bwalu, ngiikàdilù wa Nyumà ùdi ùpàtula ànu Dìyì. Amen. Nkàadi mubangè kudyùmva butèndeledi bùmhwela. Cyà bushùwa.

147 Kí ncintu nànsha cimwè cyùdi wèwè uteeta kwenza to, kí ncintu nànsha cimwè cyùdi ukwàtakaja to. Kwèna mwà kukwàtakaja ntèndel- . . . Kwèna mwà kukwàtakaja lupàndu to. Kwèna mwà kukwàtakaja mapà to. Bikèngela wèwè kukwàma mapà. Cyà bushùwà. Nwamònu anyi? Mù—mùkòòkò kawùtu, kawùtu wùkwàtakaja myòsà to. Wòwò wùdi ne myòsà bwalu mmùkòòkò. Wùdi wùtòloka ànu myòsà cyanàànà. Muci wà—wà—wà tumpùlùmànjà kawùtu wùkwàtakaja tumpùlùmànjà to. Wùdi wòwò wùkwàma ànu tumpùlùmànjà cyanàànà, bwalu mwoyi wàwù wùdi mùshindù awu.

148 Nènkù Èkèleeziyà wa Nzambi udi ne mwoyi kèna ùfunyika Eci to, bwà kuteetabò bwà kudìleeja ne mmwènekèlu wa cintu kampànda. Bòbò bàkaadi bamanè kwikala cikaadibò aci, ku ngàsà wa Nzambi. Nènkù Dìyì dyà Nzambi ndidìsangè naabò, ne bòbò mbadìsangè ne Dìyì adì. Ne byenzedi byàkàtwadiibwà mu mupwàngàne awu, Yesù Kìlistò, Nzambi mumwènèshìibwe mu mubidi awu, nebidipàtwilè byòbì biine mu mwena kwitabuujà yònsò mulediibwe cyàkàbìdì. Yèyè ngwàkamba nànkù. Amen. Cìkwàbò cintu nànsha cimwè kacýenakù to. Mpindyewu, aci ncintu cyà citwìshìibwe.

149 Mpindyewu, ncifwànyine kwikala ne ndambù—ndambù wa cibwejàkàjì kùdi muntu, yèyè kàyì mumanye kacýa mwadi mulelèlè wà mpungi. Mpindyewu, muntu utu kacýa kàyìkù mwibidijìibwe ku mpungi awu, ne kacýa kàyìkù mwanjì kuumumvwa to, èè, yèyè’s mmufwànyine kupeta ndambu wa cibwejàkàjì pàdiye ùmvwa cintu kampànda cipàtula mwadi mushiilàngàne ne ùkaadiye muumvùumvwe. Yèyè ùkaadi misangu yònsò muumvwe byà ne: “Kashàalè wa ku èkèleeziyà.

Ndà kafilè mukàndà wèbè *eku ne eku.*” Aci ncifwànyine kwikala ànu cimpè. Ki cyònsò cidiye yèyè mumanyè.

¹⁵⁰ Kàdi pashiishe paùkaadi walukila, ku dibàtiiza dyà Nyumà Mwimpè, wakula bwà bukolè bwà Nzambi ne bintu bìdìYe wènza abi; ne mùdìdi dyènzeja bakàji ne balùmè, bònsò bàbìdì, bwà kudisukula, ku nsòmbelu wa mpèkaatù; mùdiye ùbàfikisha ku dyenda ne nsòmbelu wa difwànà dyà Nzambi, ne meeji matòòke. Ne bintu bìdìdi dyènza, ne bitwàla dibàtiiza, dyakula dyà mu myakulu, dyondopa dyà babèèdi, diipata dyà badémòns, dyamba dyà bipròfeta, mapà, kaa, bikèèna-kumòna, bintu byònsò mu Èkèleeziyà. Alèluuyàh! Ncyà bushùwà. Pàdìdi diya apu, dîbà adi bìdì ne ndambù wa cibwejàkàji kùdì aba bàtu kacya kabàyikù banji kuumvwa mpungi wa mùshindù awu nànsha.

¹⁵¹ “Èè,” mùdi wèwè wamba, “wanyì èkèleeziyà kàtukù ùlongesha aci to.” Dîbà adi kaciyèna cyèla mpungi wa Èvànjeeliyò to. Butùmbi’s wè! Cyà bushùwà.

¹⁵² Kàdi bwà màsàlaayi malongèshiiibwe awu, àlèluuyàh, pàdìwo ùmvwa mwadi wà mpungi awu, mamanyè mwà kwimana mu bulongàme. Ndà kumpàla, wèwè disàlaayi dyà Kilistò! Butùmbi’s wè! Kaa, aci’s ncitwishiibwe!

“Udi ùmanya bishi ne ncitwishiibwe?”

Cidi pa Dìyi.

“Èè,” mùdi wèwè wamba, “wetù èkèleeziyà kàtu ùlongesha Aci to.”

¹⁵³ Kàdi’s mpungi ngudi uCipàtula awu. Mémè ncyèna muswè kulongeshiibwa ku twitabàayi wa èkèleeziyà to, bwalu neànyukushiibwè ne neàdishindè. Kàdi wèwè mulongèshiiibwe ku Dìyi, maulu ne buloba nebijiminè, kàdi Dìyi edi kadyàdyàkujiminakù nànsha. Twitabàayi ne twitabàayi yònsò, bikwàbò byònsò, nebìdishindè. Kàdi Dìyi edi kadyàkupangilakù to. Amen. Ki dîyi ndyòdì adi. Ki dîyi dindì mémè muswè kuumvwa ndyòdì adi. Eyowà’s, mukalenge.

“Kaa,” mùdi wèwè wamba, “nèmmanyè munyi?”

¹⁵⁴ Yesù wàkamba ne: “Mikòòkò Yànyì yìdi yùmvwa dîyi Dyànyì. Yòyi mmimanyè mpungi Wanyì.” Mmwambè, mu Yone Munsantu, nshapità wa 14 ku mvnsà wa 12 ne: “Ewu udi ungiitabuuja Mémè, byenzeni bìNdì ngenza yèyè neàbyènzè pèndè.” Mpindyewu, Yèyè ngudi mwambè nànkù.

Muntu yèyè mwambè ne: “È?”

¹⁵⁵ Ebèlù 13:8 mmwambè ne: “Yesù Kilistò ùdi umwèumwè awu makèlèlèlè, leelù, too ne kashidi.”

“Kaa,” mùdìbo bàmba, “mu mùshindù kampànda’s.”

¹⁵⁶ Mpindyewu, mùkòòkò mulèlèlè newàmbè ne: “Uh-oh. Kaa, cintu kampànda ncidilè ne dîyi dyà kaamwènzà, mu cyòci aci. Aci kí ncyumvwike cijaalàme to. Kaa, aci’s civwa ne cyà kwikala

mpungi wa ba-Français. Aci kacivwa mpungi to, bwalu Bible kàtu upàtula mwadi mulubidile to.”

157 Yèyè ùdi wàmba ne: “Nenùpetè Nyumà Mwímpè.” Kí nnè: “Nudi bafwànyine to.” “Nenùpetè, muntu yònsò.” Too ne ku díbà kaaayi? “Kùdi bàna bèènu balela, ne kùdi bàna bàà bàna bèènu balela, ne aba bàdi kule, mu búngì bwònsò mene bwàbìikilàbo kùdi Mukalenge Nzambì wetù abu.” Yèyè neèlè mpungi mu cisà cyònsò ne mu lukòngò lwònsò, ne bóbò nebúmvwè díyì dyà mukana Mwèndè. NebàDítàbùùjè, aba bàdi balongolwela Mwoyi abu. Amen. NebàDítàbùùjè bwalu mbamanyè ne Dìdi mpungi wa Èvànjeeliyò awu munkaci mwa kudila. Dyòdi kí ndilubidile nànsha. Dìsàlaayi dyònsò dìdi dimanya mwà kwimana.

158 Mpindyewu, nudi bamòne Peetèlò, ne Yone, Yakòbò, ne èkèleeziyà wa ku cibangidilu, bènda batàngile kumpàla mùshindù ewu, bwalu mpungi, Yesù wákamba ne: “Ndàayi pa buloba bujimà, nùkayishè Èvànjeeliyò.” Maako 16, nwamònu’s, “Bimanyinu ebi nebifilè aba bàdi bìitabuujà.” Tudi tumòna Peetèlò, Yakòbò, Yone, ne bakwàbò bònsò bàditèeka mu mulongo, bàya batàngile ku Cyòci aci.

159 Kàdi twètù tukùdimuka tulonda mukwàbò njila, tuumukaKù anyi? Ewu wènda mutàngile kumpàla, mukwàbò ùya mutàngile paanyimà anyi? Ewu wàmba ne: “Èè, aci cívwa mbwà mukwàbò. Aci, adi—adi díyì, dívwa mbwà mukwàbò.” Kaa, to. Kacyèna mwà kwikala nàнку nànsha.

160 Cilwilu cijimà cyà beena Kilistò cìdi cyùmvwà mpungi awu. Nzambì ùvwa mwambè ne yèyè awu ki uvwa mpungi. Kèna mwà kumushintulula to. Ki mpungi uvwaYè mwambè ne ngwíkala mwà kwediibwa. “Ku cyòci eci nkwàmányinà bantu bònsò,” ne ki Èkèleeziyà uyààya wàwa.

161 Bàmwè bàà kùdìbo kabèèna bìitabuuja Dilwà Dyèndè mu mubidi adi to. Bible mmwambè ne Yèyè neàlwe, pa nàнку twètù tudi bindile Dilwa Dyèndè. Yèyè kàyi mulwè dilòòlò edi to, netwindilè mu dindà. Yèyè kàyi mulwè mu dindà to, netùMwindilè màalabà dilòòlò. Ne netùtungunukè ànu ne kwindila. Twètù baponè mu tulù, wètù—wètù. . . katwèna bafwè bwà cyanààna to. “Bwalu mpungi wa Nzambì neàdilè mpungi wa ndekeelu awu, ne bafwè mu Kilistò nebàbiikè. Ne twètù bàdi ne mwoyi ne bashààle netwàngaciiwbè muulu pàmwè naabò, bwà kutwilangana ne Mukalenge mu mpeepèlè, ne netwikalè kwòkò aku bwà kashidi.” Ki mwadi wà mpungi ngwòwò awu. Nànsha mémè mwikàle ne mwoyi anyi mwikàle mufwè, kabyèna ne cidìbi bishintulula to. Nèngúmvwè mwadi awu. Nèmbiikè ku lufù. Butùmbi kùdi Nzambì! Nèmbiikè. Kaa, èyowà’s. Èyowà.

162 Yesù wákamba, ne: “Mikòòkò Yànyì yìdi yùmvwà díyì dyà mukana Mwànyì.” Yèyè ùvwa Díyì dimwènèshìibwe. Pàvwa. . . Mùshindù awu ki wùdi mikòòkò Yèndè yìMumanya.

163 Mpindyewu tàngilàayi Bàfaalèsà ne bakwàbò abu mu ditùkù adi. “Kaa,” mwàkambàbo, “Muntu ewu m’Beelèzèbùlà.” PààkambilàYe mukàjì wa ku ciinà cyà màyi awu, mwaba awu, bwà mpèkaatù yèndè, baabàyèndè bàkaavwàye naabò abu, pààkambilàYe Natànàèlà mwaba wùvwàye, mwinshì mwà mucì mwàkamubiikidilà Filipò, mwinshì mwà mucì wà mfigi amu, ùsambila, mòna’s, balongeshi bàà mu ditùkù adi bààkamba ne: “Muntu ewu m’Beelèzèbùlà. Ndémon. Mmwena lubùkù.”

164 Kàdi kabìvwa nàнку ne Peetèlò, Yakòbò, ne Yone, ne bakwàbò bàà kùdibo abu to. Bòbò bààkacimanya. Bwà cinyì? Bàvwa bamanyè ne Nzambi ùvwa mwambè ne pàvwa Maasiyà mwà kulwa, bilondèshile díyi disonsola dyà mukana mwà Mòsà, Yèyè neikalè mupròfetà. Nénku pààkamònàbo bintu bìvwàYe wàmba bìmwèneshiibwa ne byènzeka ànu mu byòbì, bààkamanya ne civwa ncyàkudya cyà mìkòòkò. Bààkamanya ne ki civwà mpungi. Ki kubangabò bènda bacilonda. “Mìkòòkò Yànyi mmicimanyè,” bwalu bààkamòna Díyi dyà Nzambi dimwènèshìibwe.

165 Mpindyewu, bantu leelù ewu, kabèèna bìitabuuja ne kùdi cintu pààci ne ndibàtiiza dyà Nyumà Mwímpè to. Bàpìcila mwab’ewu anyì mwaba kampànda wùdìbo ne Nyumà Mwímpè, ne bàmòna mulayi wà Nzambi munkaci mwà kuula ànu menemene, mòna’s: “Mìkòòkò Yànyi yidi yùmvwa díyi dyà mukana Mwànyi.” Mmimanyè mwadi wà mpungi awu bwalu m’Bible. “Yesù Kilistò umwèumwè awu makèèlèlà, leelù, too ne kashidi.” Yèyè ùcidi ànu Ebèlù 13:8 awu, menemene.

166 Nànsha kayòbì ne, mpindyewu, kacyèna ne cidici cìshintulula to nànsha kakesè bùngi bùdi mpungi yà èkèleeziyà munkaci mwà kudila. Tudi ne beedi bàà mpungi yà èkèleeziyà bùngi cyanàànà, nudi bamanyè’s, bèèlela bintu byònsò cyanàànà, bàmba ne: “Kaa, matùkù a bishimà àkaadi mamanè kupìta. Cintu pààci ne ndyondopa dyà kùdi Nzambi kacitukù to.”

167 Kaa, mìkòòkò mìlelèlà kayìtu yitèèleja byà nàнку awu abi to. Kàdi yidi yitèèleja mpungi awu, mulelèlà awu.

168 Mpungi wa èkèleeziyà awu mmufwànyìne kwamba ní ncinyi cyònsò. Wèwè udi mufwànyìne . . . Tàngilàayi cidìyi naaci leelù ewu, mpungi yà èkèleeziyà ayi. Ewu ùdi ùya mu *nùнку*, ne ewu ùya mu *nàka*. Kàdi dyabùlù mmusòmbe paanyimà apu, wàmba ne: “Balùmyàna, bòbò’s bàdi ànu bàlwishangana muntu ne mukwèndè. Kwàjiki’s. Kabyèna nànsha bìkèngela bwà mémè kunyungisha cyanza to.”

169 Kàdi, mwanèètù, bòbò bònsò balwe ku byà mvità musangu kampànda, bàalukilè ku mèyi matùma à bantu bònsò. Kaa, èkèlekèle! Dìbà adi nenùmonè cyà ne “ndàayi kumpàla, māsàlaayi à Kilistò” aci, cyà bushùwà’s, kabìyi byà kutèèleja mpungi kampànda to, kàdi kutèèleja mpungi awu.

170 Twǎnjì twìmanàâyibi, ànu bwà katanci kakesè cyanàànà, bwà twàlukilèku paanyimà bwà kutàngila ndambù mpindyewu. Tukààdi pabwîpì ne kujikija, bwalu ncyèna muswè kunùlama apa ntàntà mule menemene to. Kàdi twàlukilàayi cyànyimà bwa tütangilèku bàmwè bàvwa bumvwè mwadi ewu. Twàngatàâyibi. . . Ne bôbò bàvwa batwishìbwe. Mpindyewu, ngànùleejì ne bintu bikwabo byônsò mbilubìdile. Twàngatàâyì ànu muntu wa kale umwèpelè, bwà katanci kakesè cyanàànà.

171 Twàngatàâyì mupròfeta Yobò. Mpindyewu, muntu awu wàkapticila ku diteeta, kàdi ùvwa mumanyè ne Nzambì ùvwa ùlòmba mulàmbu wà dyosha. Ki cìvwa Nzambì mulòmba, ne ki cyònsò cìvwa Ye ùlòmba. Nènku nànsha mwàkenzeka dikèngà dyà cìmpicìmpi mu dîkù dyènde amu. . . Nzambì kàtu misangu yònsò ànu. . .

172 Panùdi numòna maalu ànyangukila muntu, aci kaciyèna cyùmvwija ne ùdi munkaci mwà kwediibwa mfimbù kùdì Nzambì nànsha. Mbifwànyine kwikala ne kî ne yèyè keena mu diswa dyà Nzambì to. Yèyè mmumanyè munda mwà mwoyi wèndè amu ne yèyè ùdi munkaci mwà kutèeleja mpungi anyi to.

173 Nzambì ùvwa mùlòmba mulàmbu wà dyosha ewu, ne Yobò ùvwa mwimànepù ne makàsà àbìdì. Kwàjiki. Bôbò kwamba ne: “Yobò, wèwè udi ngènzàmpèkààtù wa mu musokoko. Udi munkaci mwà kwenza cintu kampànda cyà cibi.” Kàdi yèyè ùvwa mumanyè bishìilangana. Kushàalayè ànu mwab’awu, bwalu ùkaavwa muumvwè mwadi wà mpungi, ne wàkashàala ànu naawu mwab’awu.

174 Ki, ndekeelu wa byònsò, ànu lwà kùndekeelu menemene aku, pàvwàye. . . Dyabùlù ùkaavwa mulekelela pambidi pèndè, ne mwangàte fàmìyè wèndè, ne mwangàte bàna bèndè, mwangàte tuumeelù twèndè, ne mwangàte bubanji bwèndè bwònsò, mucìbwile bukolè bwèndè bwà mubidi paanshi. Kushàalayè musòmbè pa mushikì wà butù. Kwenzabì ànu bu ne byònsò bìvwa biyè. Kàdi yèyè ùcìvwa ànu wàmba ne: “Ndi mumanyè ne Mupikudi wanyì ùdi ne mwoyi. Ku matùkù a ndekeelu Yèyè neimanè pa buloba. Nànsha misàndà yà mu dikòba mibùtùle mubidi ewu, nànsha nànkù mu musunya wànyì nèmmonè Nzambì.” Kakùvwa cintu nànsha cìmwè cilubidìle pa bwalu abu to, mmwòmò anyi? Kabiyi ne: “Ndi—ndi—ndi—ndi bu ndi ngeela meeji ne Ùdi ne mwoyi to.” Yèyè wàkamba ne: “Ndi mumanyè ne Yèyè ùdi ne mwoyi, ne Yèyè neimanè ku matùkù a ndekeelu pa buloba. Nànsha misàndà yà mu dikòba mibùtùle mubidi ewu, nànsha nànkù mu musunya wànyì nèmmonè Nzambì.” Kaa, ekelekèlè! Byàkenzeka’s. Yèyè ùvwa mutwishìbwe ànu menemene.

175 Abraham, mupàtuke wènda wèndakana ditùkù kampànda mu budimi, kuumvwayè Nzambì wàmba ne: “Abraham, Nèngikalè mwà. . .” Yèyè wàkatwilangana ne Abraham

kumpàlà kwà Dîyi difùnda, ne Wākamba ne: “Abraham, Nènkupèèshilè mwànà wa balùme ku mukàjèèbè, Sarah.” Ne mukàji ùkaavwa ne bidimu makùmi àsambòmbò ne bitaanu mwinè musangu awu, ne Abraham ne bidimu makùmi mwandamutekètè ne bitaanu. Ki bóbò kudilongolola bwà cyòci aci, kàdi yèyè kàvwakù ne bundù bwà kufila bujaadiki to. Ùvwa mumanyè ne ùvwa ne cyà kupeta mwànà awu.

¹⁷⁶ Ne Bible mmwambè ne: “Yèyè kààkatènkakanakù ku mulayi wà Nzambì ku bupidyà to, kàdi ùvwa mutwìshìibwe ànu menemene.” Amen. Mutwìshìibwe ànu menemene, mbwena kwamba ne ùvwa mutwilàngàne ne nkàmisha awu. Amen. Ki cyòci aci. Nkàmisha ki ndekeelu wa njila. Ki cintu cyà ndekeelu. Kì—kì cyònsò ciinè.

Yèyè ne: “Ndi mutwìshìibwe ànu menemene ne, cidi Nzambì mulayè, Nzambì mmukùmbàne bwà kucyènza.”

¹⁷⁷ Wèwè udikù, dilòlò edi, udikù mutwìshìibwe ànu menemene ne eci n’Nyumà Mwímpè anyi? Udikù mutwìshìibwe menemene ne, ewu ki njila anyi? Udikù mutwìshìibwe ànu menemene ne, Yèyè m’Mwondopi anyi? Udikù mutwìshìibwe menemene ne Yèyè ùlwalwa cyàkàbidì anyi? Nudikù batwìshìibwe ànu menemene ne Yèyè udi umwèumwè awu makèèlèlè, leelù, too ne kashidi anyi? Amen. Mutwìshìibwe ànu menemene! Èyowà.

¹⁷⁸ Twàngatàayi mukwàbò, Eliyà, mwimàne pa mukùnà pààpa. Ùvwa mukòkàngàne ne Izàbèlè wa kwìsù kulaaba bilaabu awu, ne ùkaavwa muumvwè bibangè ne kumucyòkesha. Pàmwè ne bakàji bònsò bàtu bàtèèka mukàji wa mfùmù bu citembelu, pàmwàpa nsukì mikòsa cisuba ne byònsò bìvwàbo naabi mu ditùkù adi abi. Ùkaavbwa mukòkàngàne nendè pa bwalu abu bikolè mu mùshindù wà—wà byambè kumuvingila panshì.

¹⁷⁹ Dyàkàmwè, Nzambì kumwambilaYè ne: “Pwekà kuntwaku. Nudi bamanyè’s, mvùla yitu yilòka matùkù bu àbìdì anyi àsàtù ònsò ku lumingu, mu nyungulukilu emu. Kàdi ndà wimanè kumpàlà kwà Aakàbà, ùmwambilè ne: ‘EMU MMÛDÌ MUKALENGE WÀMBA. Lumuma kalwàkumata lùfùma mu dyulu to anu mèmè mulùbìikile.’” Kaa, ekèlekèle!

¹⁸⁰ Yèyè kààkamba ne: “Mpindyewu, Aakàbà, misangu mikwàbò, pàmwàpa ncifwànyine kwenzeka mu mùshindù ewu.” Kaa, to. Ùvwa mutwìshìibwe ànu menemene, kakùyi cyà cilubidile nànsha cimwe to. “Lumuma kalwàkumata to, mvùla kayààkulòkaku to, ànu mèmè mulùbìikile.” Amen. Butùmbi’s wè! Kaa, bwà cinyi? Ùvwa muumvwè mpungi. Cìvwa cyà citwìshìibwe. Ùvwa mumanyè Nzambì Wendà. Ùvwa mumanyè ne cintu kampàndà ncifwanyine, pààkaakulà Nzambì Dîyi adi, mauu ònsò ne buloba bìvwa mwà kujìmina too ne pàvwàdi—pàvwàdi dyènzeka, cìvwa ne cyà kwenzeka. Ùvwa cyà bushùwà mutwìshìibwe.

181 Mpindyewu, Yêyè kwamba ne: “Eliyà, Ndi muswè ùbandè kuntwaku mu mwaba wà mutàmbe kwikala mûme mu ditunga amu awu, kuulu menemene kwà mukùnà kwàka kùdì kakùyì tusùlù to. Kàdi Ndi pù ne kàmwèpelè bwèbè wèwè.”

182 Ûvwa mutwìshìibwe ànu menemene. Yêyè kubànda kuulu kwà mukùnà aku ne kusòmbayè pabwìpì ne kasùlù kàà Keelità apu. “Kàdi mpindyewu cingènzà ki cinìyì kuulu eku?”

“Nkààdi mumanè kutùmina bikòlòlò díyì bwà kwikalabi bìkudiisha.”

183 “Mpindyewu, mmunyi mwìkalà bikòlòlò abi . . . Mpindyewu, anjì indilàbi kakesè tûng, Mukalenge?” To, to. Mpungi ùvwa mudilè. Abi’s mbikùmbàne. “Nebyènzèkè bishi? Ncyèna mumanyè to. Ncyèna mbìcyùka to. Nwamònu anyi? Ki mbwalu bwànyì mèmè bwà kuditàcisha bwà aci to. Abu bwalu mbwà Nzambi. Yêyè mmwambè ne mMutùmine bikòlòlò díyì.”

184 “Èè, Mukalenge, udikù mwà kuswà bwà Wèwè kucìnsùnswila, ne kungambilakù ànu ne mpenyì pàdi byòbì abi . . . nku cilongelu kaayi cìtùku bikòlòlò abi biyè kuntwaku, bwà kuyiila mwà kwakula cyena-Ebèlù? Mmùshindù kaayi wà . . . Bidi bìipikila pa macyùwà à gaz anyi, anyi bidi ne mudilu wà nkùnyi, anyi bidi bìcyènza bishi’s? Ne nkwèpì kwìkalàbi . . . Nnyama wa mùshindù kaayi wàshebeyabi? Pààbì nyawù bìdi ànu nyuunyi yà mikesè. Mmunyì mwìkalàbi mwà kunshebeela ngombe, bwà kuntwàdilabi dyàmpà dyela minyìinyì yà ngombe?” Nwamònu anyi? Nwamònu anyi? Kàkeelakù ayi nkonko nànsha.

185 Nzambi, mpungi wa—wa Nzambi, Dìyì dyà mukana Mwèndè dyàkadila e kwamba ne: “Nkààdi!” (Kabiyyi ne: “Eliyà, Ndi mufwànyìne kucyènza to.”) “Nkààdi mucyènzè.” (“Nèncyènzè.”) “Nkààdi mumanè kucyènza.” Amen.

186 Ki Nzambi wetù nyawù, dilòòlò edi. Kabiyyi ne: “Neàcyènzè to.” Ûkaadi mumanè kucyènza. Amen. Ûkaadi mumanè kucyènza. Amen. Kabiyyi ne: “Yêyè neàcyènzè; Yêyè mmufwànyìne; pàmwàpa Yêyè neàcyènzè to.” Ûkaadi mumanè kucyènza. “Ndi mutùmine bikòlòlò díyì.”

187 Wàkatùmina Nyumà Wèndè díyì kùdì bantu bònsò. Wàkatùmina mabènesha Èndè díyì. Wàkabànda mu Dyulu, ne wàkapèèsha bantu mapà. Muntu kampànda neikalèku mwà kucipeta. Muntu kampànda neàcibèngè. Kì mbwalu bwànyì bwà mùshindù wùdìci cìlwa nànsha. Cìdi ne bwalu cìfikà. Nzambi ngudi mwambè ne bìvwa mwà kwikala nàнку, ne ki mùdìbi nàнку. Peetèlò wàkamba, mu Ditùkù dyà Mpenta ne: “Nyingàlalaayi, yònsò wa kunùdì, nùbatijjibwè, Dìna dyà Yesù Kìlistò bwà dilekelediibwa dyà mpèkaatù yènu, nènkù nenùpetè dipà adi, Nyumà Mwìmpè.” Yêyè neàlwe bishi? Ncyèna mumanyè to. “Mu—mulayi wùdì kùdì bânà bèènu balela, kùdì aba bàdi kule, mu búngì bwònsò mene bwàbìikilàbo kùdì

Mukalenge Nzambi wetù abu.” Mpindyewu, kwèna mufwànyine kuumusha aci ku dyumvwija to. Mpungi ùkaadi mumané kudila, ne mêmè ndi ncìitabuuja. Ndi mucitùmikile, ne mucìpetè. Amen. Mpindyewu teetaàku bwà kukòkangana naanyi kumpàtùlamu musangu nànsha wùmwè tǔng. Amen. Kaa, mêmè ncyèna mupwàngane to. To.

188 Byenzè bu dilòlò adi, mwanèètù wa bakàjì mukùlàkàjì wa bafìke awu, kwambayè ne: “Mukùlù, ndikù mwà kufila bujaadiki anyi?”

“Èyowà’s, màndamù.”

189 Yèyè ne: “Ndi muswè kwamba cintu cimwèpelè eci.” Yèyè ne: “Ncyè—ncyè—ncyèna cìndì muswè kwikala to.” Ki yèyè ne: “Ncyèna cìvwà cikèngelà mêmè kwikala to. Kàdi, kùdi cintu cimwèpelè cìndì mumanyè ncyà ne, ncyèna cìmvwà kale wàwa to.”

190 Pa nànkù, aci, mùshindù awu ki wutùdi tudyùmvwa bwà cyòci aci mpindyewu. Ncyèna cìmvwà kale wàwa to, bwalu ndi musùngìdiibwe dilòlò edi, ku ngàsà wa Nzambi, ne mupeètè dibàtiiza dyà Nyumà Mwìmpè, pa mudimu mumutùma naawù. Wàkiicikijiibwa kuntu kwàka mu Ditùkù dyà Mpenta, mulayi mufila awu, ne mêmè kuwìtabuuja. Kakwèna cintu nànsha cimwè cilubìdìle to. Ngàkumvwa mwadi awu. Mêmè kuwùtùmikila, ne ndi mutwishùbwe ne ki wòwò. Cyà bushùwà’s. Ndi mumanyè ne ngòwò. Bushùwà.

191 Simèònà, mukùlàkàjì wa lungènyi wa bidimu bìipacila ku makùmi mwandamukùlù, bidimu nkàmà kacya mene mupròfetà wìkala pa buloba, kàdi wunyunguluka mwikàle mumanyikè bikolè menemene. Nyumà Mwìmpè wàkaakula nendè dǐngà ditùkù, wamba ne: “Simèònà, udi mumanyè’s, kwàkufwà kùyi mumòne lupàndù lwà Mukalenge to.” Butùmbi’s wè!

192 Pàmwàpa mwakwidi munène, ùdikùpula ku mwedi ndambù wa misangu, kwambayè ne: “Simèònà, bìvwa bikèngela bwà wèwè kusaamunakù mwedi wèbè awu luseke lukwàbò’s.”

Yèyè ne: “Aci kacýèna ne cìdìci cìshintulula to nànsha kakesè.”

“Wàmanyi bishi mùdi mubingè?”

“Nyumà Mwìmpè ngudi mungambìle nànkù. Ncyàkufwà to.”

193 “Mòna’s, Simèònà, mòna’s, wèwè’s udi. . . Mòna’s, wèwè’s ukàadi pabwìpì ne kufwà mpindyewu mene.”

194 “Kaa, cyùdi wèwè wamba nànsha ciikàle cinyi. Kàdi Nzambi mungambìle ne mêmè ncyàkumòna lufù nciyi mumòne lupàndù Lwèndè to. Kakwèna cintu nànsha cimwè cilubìdìle to. Ncyàkufwàku to. Ncyèna mwà kumòna lufù nciyi muMumòne to.” Amen. Ki cyòci aci.

“Newěnzè ciine aci bìshi’s, Simèònà?”

“Mémè, abu kî mbwalu bwànyì mémè to.”

“Yéyè mwinè ùdi penyì, Simèònà?”

“Ncyêna mumanyè to.”

“Wámányì bìshi muwàMumònà?”

195 “Nzambì ngudi mwambè nàнку. Ki cyôci aci. N’Dìyì. Ncyàkumòna lufù nciyi muMumòne to.” Kaa, ekèlekèle!

196 “Kaa, mukwàcikwètù mukulakaji wè. Mu bushùwà bwà bwalu, yéyè’s ùdi ne mutù mumunyùngùlùke, nudi bamanyè’s. Pa nàнку mulekèlaayi ànu cyanàana.”

197 Kàdi yéyè wàkaMumòna’s, nànsha byà munyì. Èyowà’s, mukalenge. Nzambì ùdi ùpenga njila bwà bantu bàdi baswè kwangata Dìyì Dyèndè.

198 Yesù, pàvwàYe pa buloba apa, ne Ûvwa mwimàne ku lukità lwà Lazàrò kwàka.

199 Anyì, kumpalà kwà cyôci aci, pàvwàYe mu dikòkangana ne—ne bantu, dyà kwambilangana pa mùvwàYe, pèndè kàyi mwanjì kwikala ne bidimu makùmi àtaanu to, kàdi wàmba mùvwàYe mumòne Abraham. Nudi numòna mùvwàYe mutwishùibe amu anyì? Wàkamba ne: “Kumpalà kwà Abraham kwikalayèkù, NDI. NDI.” Kabìyi ne: “Mvwa, anyì Nèngìikalè to.” Kàdi ne: “NDI. Ndi mutwishùibe.”

200 Pashìshe, Yéyè kwamba, ku lukità lwà Lazàrò, kumpalà kwa Yéyè kupweka kuntwaku, kwambaYè, wàmbla Marta, Yéyè ne: “Mémè Ndi dibìikà dyà ku lufù, Mwoyi.” Kabìyi ne: “Bìvwa bikèngela Ngìikalè, anyì Nèngìikalè to.” Kàdi: “NDI.” Amen.

201 “Mwanèètù wanyì, bu ne Wèwè uvwa mwab’ewu, nùнку yéyè kî mmufwè to. Kàdi nànsha mpindyewu, Mukalenge, cyònsò cyùdi Wèwè ulòmba Nzambì aci, Nzambì neàKupèèshèci.”

KwambaYè ne: “Mwanèènù awu’s neàbiikè ku lufù.”

202 “Kaa, yéyè’s neàbiikè ku lufù mu matùkù a ndekeelu, ku dibìikà dyà ku lufù dyà bantu bònsò adi. Yéyè ùvwa nsongàalùmè mwímpè. Èyowà, ngeela meeji ne neàbiikè ku lufù.”

203 Kàdi Yesù kuDìlùlamija, yéyè mwinè, bímpè, wàmba ne: “Kàdi Mémè’s ndi dibìikà dyà ku lufù ne Mwoyi.” Kabìyi ne: “Nèngìikalè; bìvwa bikèngela Mémè kwikala,” anyì bikwàbò to. “NDI.” Kakwèna cintu apu, kakwèna cyà dyelakana, cyà dikànkila pa bwalu abu. Kakwèna cìdi cilubidile to. Cìvwa cilelèlà.

204 “Ndi dibìikà dyà ku lufù ne Mwoyi. Ewu udi uNgiitabuuja, nànsha byòbì ne mmufwè, nànsha nàнку yéyè neikale ne mwoyi. Ewu yònsò udi ne mwoyi ne uNgiitabuuja kàadyakufwàku to.” Kabìyi—kabìyi ne: “Mmufwànyine kubènga kwikala nàнку. Pàmwàpa kààkwikala nàнку to.” “Kàakufwàku to. Kakwèna

cintu nànsa címwè—cintu nànsa címwè cilubidile pa bwalu abu to. Yèyè kààkufwàku to.”

205 “Ewu udi umvwa Méyi Àanyi ne wítabuuja Ewu udi muNtùme ùdi ne Mwoyi wà kashidi, ne kààkupicila nànsa mene ku Cilumbulwidi to, kàdi ùkaadi mumane kuumuka ku lufù muyè ku Mwoyi.”

206 “Kabivwa bikèngela bwà kupicilayè ku Cilumbulwidi anyi?” Yèyè kààkupicila ku Cilumbulwidi to. Amen. Yèyè wàkangata Cilumbulwidi cyànyi. Ncyèna ne bwà dyenza kuntwaku to. Amen. Ki bwalu mbwòbù abu’s. “Muumùke ku lufù muyè ku Mwoyi.” Kaa!

207 Mpindyewu kwambayè ne ùvwa mucítàbùùje. Mpindyewu, kacya Yesù kààkambakù ne: “Èè, udi mumanyè’s, bu mùdi wítabuuja nàнку, ne udi mumanyè ne Mémè ndi Dìyi, ne—ne Ndi—Ndi. . . Udi mumanyè ne Mémè ki Yèyè uvwa ne cyà kulwa awu. Wajikulu cyòci aci. Wacitàbùùji. Nénkwambilè citùdi bafwànyine kwenza. Tùkasangishè bakùlù, tùpwekèku bwà kumòna ní tudikù mwà kwenza ní ncinyi ní ncinyi pa bwalu abu.” To, to. Wàkamba ne: “Nèngiikalè. . .” Kabiyi ne: “Mpwekè *nkamònè* ní Ndi mwà kumubiisha ku lufù to.” “Nènye kamubiisha.” Amen. Kabiyi ne: “Nè—Nènteetè to”. “Nèmmubiishè.” Kakùvwa cintu cilubidile to. Aci kacivwa mwadi mulubidile to, pààkambàYe ne: “Nèmmubiishè. Nèmmubiishè.”

208 Nènkù Yèyè umwèumwè wàkamba ne: “Nèmmubiishè awu,” ngudi mukwenzèle mulayi ewu. Àlèluuyàh! Kaa, ekèlekèle! Amen.

“Nènye kamubiisha.”

209 Yèyè wàkamba kàbidi ne: “Shimbùlaayi ntempèlù ewu, ne Mémè nèmmonè cìNdi mwà kwenza pa bwalu abu anyi?” “Shimbùlaayi ntempèlù ewu, ne Mémè nèmmujuulè cyàkàbidi mu matùkù àsàtù.” Kakwèna cintu cilubidile to. “Mpindyewu Nènteetè. Nwènù bònsò nudi bafwànyine kwikala biimànyine mu nyùngulukilu amu bwà kumona ní Ndi mwà kucyènza anyi to”? Aà, to. “Nèmmujuulè.” Kakwèna cintu cilubidile to. “Nèmmujuulè. Nù—nùmushimbùlè; Mémè nèmmujuulè.” Kaa, ekèlekèle!

210 Bwà cinyi? Ùvwa mumanyè ne Yèyè nguvwa Muntu awu, mu Mifùndu amu, uvwa Davidi mwambè awu. “Ncyàkulekela musùuka Wèndè mu ifernò, anyi Ncyàkwitaba bwà Wa Cijila Wanyi àmonè dibola nànsa.” Nènkù Ùvwa mumanyè ne Yèyè ùvwa mubadiibwe mu mulayi wà mu Mifùndu awu, ki bwà cinyi Ùvwa mutwishiiibwe.

211 Mpindyewu, twètù katwènakù mwà kwikala batwishiiibwe mùshindù awu anyi? Tudi tuMwangata, bu cileejilu, bwà bikwàbò bintu. Pàdibi ànu ne Dìyi dyà Nzambi ndidi dicyámbe,

twètù katwèna mwà kwikalakù batwishùbwe menemene bwà Díyì mùvwàYe Yèyè pa bwalu abu anyi?

212 “Mémè ndi dibìikà dyà ku lufù ne Mwoyi.” “Mémè nêmmujuulè cyàkàbìdì.” Amen. Bwà cinyi? Ùvwa mumanyè ne Díyì òvwa dyakùle bwà bwalu abu, ne Yèyè ùvwa mutwishùbwe bwà kupàtuka.

213 Pìikalàbi ne mémè ngudi muntu awu mu Yone 5:24 ne: “Ewu udi umvwa Díyì Dyànyì ne wìtabuuja Ewu udi muNtùme, ùdi ne Mwoyi wà kashidi, ne Mémè nêmmubiishè ku lufù ku matùkù à ndekeelu. Yèyè kàakupìcila ku Cilumbulwidi to; muumùke ku lufù muyè ku Mwoyi.” Kì—kì twètù abu. Kadi citùdì tuumvwila bwòwà ncinyi? Mbwalu kaayi ebu’s?

214 Cimanyinu cyùdì naaci cìdì cìshintulula cinyi? Wèwè udi udibìikila mùdì *cikampànda*, *cikansanga*, anyi *cikankènga*. Twètù’s tudi bânà bàà Nzambi, ku ngàsà wa Nzambi. Tudi buujùbwe ntèntè ne Nyumà Mwímpè, ku ngàsà wa Nzambi. Bìdì bishintulula cinyi bwà ne *kampànda* ewu ùdi *cikansanga*, anyi *cikankènga*, pìikalàye Presbytèrien, Méthodiste, Baptiste? Pìikalàye mùle ntèntè ne Nyumà Mwímpè, yèyè’s ùdi ne Mwoyi mubiishanganyi wà ku lufù. Amen. Èyowà. Mpindyewu, mu Ditùkù dyà Mpenta . . .

215 Yesù wàkabambila, mu Luukà 24:49 ne: “Mònaayi, Ndi ntùma mulayi.” Kabìyi ne: “Ndi mufwànyine kucyènza. Némmonè cìNdi mwà kwenza pa bwalu abu to.” “Néntumè mulayi wà Taatù Wanyì pambidi pèènu. Kàdi bàndaayi ku cimenga cyà Yelusàlemà nùshaalè bindìle too ne panwàvwàdikiibwà ne bukòlè.”

216 Mpindyewu, kàdi bu bóbò mwà kwikala bindila, kwamba, kaa, matùkù àsambòmbò, kwambabò ne: “Citùdì bindìle ncinyi? Ngeela meeji ne bìvwa bikèngela twètù kuciitaba ku diitabuuja. Kanwènaayikù pèènu nwela meeji nànkù anyi?”

217 Kàdi bu ne Yakòbò wàkamba, mu—mu ditùkù dyà citèemà, wàmba ne: “Simonà, anji lwilàbi apa bwà katanci kakesè. Udi mumanyè’s, ditùkù adi’s mvwa muumvwè njiyà yà mùshindù wà pabwàwù. Wamònu anyi? Kàdi udi mumanyè cìndì mémè ngiitabuuja anyi? Ndi—ndi—ndi ngeela meeji ne Yèyè kènà ànu muswè bwà twikalè bindìle kaaba aka to. Mémè ndi ngeela meeji ne tukàadi—tukàadi bamanè kucipeta. Kwènàku wela meeji nànkù anyi? Tùkatungùnùkè ne mudimu wètù. Tùtungunukè ne mudimu wètù wà bwambi?” Kaa, kacìvwakù mwà kwikala cyenzèke to.

218 Bwà cinyi? Bàvwa bamanyè ne mupròfeta ùvwa mwambè. Mpindyewu tèelejààyaaku. Mupròfeta wàkamba ne: “Bìdì ne cyà kwikala kanungu pa kanungu, mulongo pa mulongo, pa mulongo; ndambù apa ne ndambù pààpa.” “Kwàtaayi bikòlè ku cìdì cìmpè.” “Bwalu ku mishìkù yìdì yìkukuminà ne mu myakulu mikwàbò kì kùNgàakwilà ne cisàmbà eci. Nènku kì diikisha

ndyôdi edi, nsabatu awu.” Bâvwa bamanyè ne bivwa bikèngela bwà cintu kampànda kwenzekaci pàvwàCi ne cyà kulwa apu.

219 “Mémè nêngiicikijè Nyumà Wanyì mu ditùkù dyà ndekeelu.” Yowèlà 2:28: “Nebyènzekè mu matùkù à ndekeelu, mùdi Nzambi wàmba, Nêngiicikijilè Nyumà Wanyì pa mubidi wònsò, ne bânà bèènù balela balùmè ne bakàji nebâmbè bipròfetà. Pa basadidi Bâanyi balùmè ne bakàji Nêngiicikijè Nyumà Wanyì, mu ditùkù adi. Nèndeejè bimanyinu muulu mu dyulu ne—ne pashì pa buloba, ne kapyà, ne mwìshì, ne dibungi.”

220 Bâvwa bamanyè ne kùvwa ne cyà kwikala dishindikijiiibwa dyà dilabula kampànda difùmina ku Nyumà Mwimpè. Kabâvwa bângata mwadi kampànda mulubìdile to. Kàdi pàakumvwàbò cintu kampànda aci cinyunga, ne kumòna cileeji cyà Bible cyènda cinyunga naaci, kabivwa bilubidile to. Kupàtukabò buludì mu misèèsù. Nùmfwilè luse. Kaa, ekèlekèlè! Bâvwa batwìshiiibwe ne cívwa n’Nyumà Mwimpè.

221 Nudikù bamanyè mùvwàbo batwìshiiibwe anyi? Mu mùshindù wà ne, Peetèlò, kalùmyànà kàvwà kakàyi kalonge kàlaasà, kutùpikilayè pa cikuuku cyà mucì anyi pa cishèètèshèètè, anyi mwaba kampànda, kwambayè ne: “Nwènu bantu bàà mu Yudàaya,” kaacyàdi kakesè katàdika byenzè bu kataàlà kàà kapenga. Kwambayè ne: “Nwènu bantu bàà mu Yudàaya, nwènu bàdi basòmbèle mu Yelusàlèma nwé! Mémè ewu’s mwva nnumvwa bwòwà, kwenji mutànci; bwà mpindyewu, ncicyèna naabù to. Eci cimanyiibwè kunùdi, ne tèèlejàayi mèyi àanyi. Bantu aba kî mbakwàcike maalà munùdi nudicinkila amu to. Kàdi eci *cidi* n’Cyôci aci.” “Tudi *batèkèmène* ne n’Cyôci aci anyi?” “Tudi *twela meeji* ne n’Cyôci aci anyi?” Yèyè wàkamba ne: “Eci *cidi* n’Cyôci aci cyàkambàbo kùdi mupròfetà Yowèlà.” Àlèluuyàh! Kakùvwa cintu cilubidile to. “Eci *cidi* n’Cyôci aci cyàkambàbo kùdi mupròfetà Yowèlà.” Kaa, ekèlekèlè!

222 Yesù wàkamba, mu Maakò 16, wàkatuma Èkèleeziyà Wendè ne mudimu ne: “Ndàayi pa buloba bujimà, nùkayiishè Èvànjeeliyò.” “Bimanyinu ebi bivwa pàmwàpa bikèngela bwà kwikalabi; nebifilè, ku musangu ne ku musangu, pàmwàpa anyi?” “Nebifilè aba bàdi biitabuujà. Bimanyinu ebi nebilondè bàdi biitabuujà. Mu Dìna Dyànyi bôbò nebiipaté baadémons. Nebàakulé mu myakulu mipyamìpyà. Bôbò bakwàte nyòka ne byanza anyi banwè cintu cidì cishipanganà, kî ncifwànyine kubènzela bwalu to. Bôbò batentèkèlè babèèdi byanza, babèèdi nebàsangalè.” Kabìyi ne: “Pàmwàpa to.” “Nebàsangalè. Bimanyinu ebi nebilondè bàdi biitabuujà.”

223 Ngànji ncyàmbèku mu cikòsò, mu kwamba nùku ewu, mwanèètù wa balùme, mwanèètù wa bakàji, bwà tusunsa tukesè tùdi tulongà etu. Mémè ndi nciitabuuja. Ndi ngiitabuuja ne bikwàbò byònsò, cintu kanà cyònsò cidì cibènganganà ne

Cyôci aci, kî ncilelèlâ nànsha. Ndi ngiitabuuja ne, cyônsò cidi cibènganganà ne Cyôci aci necitonkokè. Ndi ngiitabuuja ne, nànsha kwôkò communismes bûngi munyî, nànsha kwikàle tusumbu bûngi *kampànda* ne tusumbu bûngi *kansanga*, ne bwena-èkèleeziyâ ne bwena-Loomò, ne bikwàbò byônsò, bwena-Àmèrikè ne bikwàbò byônsò nebitonkokè.

224 Kàdi Dîyi adi nedîshaalè Cyendèlèlèlè, bwalu Cyôci n'Dîyi kampànda. Ne kumpàlà kwâ kwikalaci Dîyi, bìvwa bikèngela bwâ kwikalaci meeji kampànda. Ne dîyi mmeeji meela patòòke. Nènku Nzambi, mu Cyendèlèlèlè, cyàkabwela mu meeji Èndè. KuleejaYè meeji Èndè patòòke. Cyàkavwijiibwa Dîyi, nènku byàkakèngela bwâ Dîyi kumwèneshiibwadî.

225 Ki bwâ cinyî, pàakaakulâYe bwâ Maasiyâ kampànda, byàkakèngela bwâ Maasiyâ kampànda awu kulwayè. Yèyè wàkamba ne kùvwa mwâ kwikala Èkèleeziyâ kampànda mu matùkù à ndekeelu, kâyi ne katobâ anyî mufudî pambidi to; nekwikalè Èkèleeziyâ kampànda kwôkù aku. Àlèluuyâh! Yèyè ngudi mucyâmbè. Mémè ndi ngangata Dîyi Dyèndè. Ndi ncitabuuja.

226 Ndi ngiitabuuja ne Yèyè wàkalaya Nyumâ Mwîmpè kùdî mwena kwitabuuja yônsò uvwa mwâ kwitabuuja awu. Mémè ndi ngiitabuuja Peetèlò, mu Ditùkù dyâ Mpenta, pàakayiishâyè diyiisha dyâ mushinga mukolè adi, ne kubâmbilayè bônso bwâ kunyingalalabò ne kubâtijiiibwabò, ne bimanyinu ebi bìvwa mwâ kulwa, ne *cikampànda*. “Ewu yônsò wasòka Dînâ dyâ Mukalenge uvwa mwâ kusungidiibwa.” Mémè ndi ngiitabuuja ne aci m'Bulelèlâ; ntu mwimânyinepù. Nkâàdikù mucimònèmòne cimwènèshiibwe.

227 Ndi mumanyè ne ki mémè kucilwangeena mvitâ eku. Ne ndi mumanyè ne ndi nteeta bwâ kwela cidya. Kumpàlà kwâ mémè kwela cidya, bikèngela ngânjî kukòsa bwalu bwônso bwâ mwandanjînga, nyîny'a cisongâ mibishi yônsò, ne bikwàbò byônsò, bwâ kubyùmusha mu njila. Kàdi musangu wônso wûdi wela cidya, udi munkaci mwâ kuya kumpàla. Amen. Angàtà wêwè ànu keelè ùbikòsè.

228 Bààbûngi bàà kunùdî mbavùlùke Paul Rader, mulundâ wa mushinga mukolè awu. Ncicivwa ànu muyiishi wa citende, mwànâ. Mvwa ne ciibidilu cyâ kuya ku Fort Wayne, bwâ kamutèeleja, ku Rediger Tabernacle. Muntu munène mule! Úvwa mwâ kuya paanyimâ menemene, kubandisha mupanù, kwela cyanza muulu ne kùkungula ne mifuunu bu nyama wa ours, ne mémè mvwa ngeela meeji ne uvwa mwâ kutùpikila mu cyambilu amu. Pàvwàye mwâ. . . Nènku uvwa ùbanga ne mutùwâ-mwanda kampànda, èyowâ, mu Genèsè, ne ùkuupuuka mu Bwàkabuulwibwâ, byônsò abi wàtwa kumpàlà wàtwa paanyimâ. Paul uvwa ànu muntu wetù wa cyâ bushùwâ ewu.

229 Dìngà ditùkù pàvwàye wàkula, kwambayè ne: “Kale wàwa mvwa mukòshi wa micì mu Oregon,” mùvwàye mufùmìne amu. Yèyè ne: “Dìngà ditùkù, nudi bamanyè’s,” mwàkambàye, “Mvwa—mvwa nsanganyibwa ànu mu budimi bwà bwambì, kule mu mwaba kampànda.” Nyewù ngápù mwoyi mpindyewu ne kùvwa mpenyi kwìnè aku’s. Kàdi ùvwa wènza mudimu wa bumpandanjila.

230 Ùvwa wìtabuuja Nzambì, wìtabuuja dyondopa dyà kùdì Nzambì. Ki Paul kwambayè, ànu mwaba mene wùdì èkèleeziyà wa pa buloba mwimanè leelù ewu ewu, kwambayè ne: “Bu ne mvwakù mufikishe mukenji wànyi wà ngàsà kùdì beena Mpenta bàà kapyà abu, pamutù pàà kwenza cìndì mwenzè neenù kaaba aka nwènù musumbà ewu,” mwàkambàye, “ne mudifikishe ku dilubakaja meeji, mubiikila ku mwaba mwikàle ne binunu kuvudija ku binunu byà ndola byà mabànzà. Ndi mudilubàkàjìje meeji mu mùshindù wà mupetè ne kànsèrè, ne mpùnga ne lufù mpindyewu. Bu ne mvwakù mufikishe mukenji wànyi wà ngàsà kùdì beena Mpenta bàà kapyà abu, nùnkù Nzambì’s mmumbènèshe byà biyiila ne panshì bwà cyòcì aci.” Cyà bushùwà.

231 Kwambayè mùvwàye kuntwaku mu—mu bisuku ne meetu amu, ne mukapetè mubidi luuyà wà tónyì tukùdimùke anyì cintu kampànda. Bìvwa bibì be. Nènku ùvwa ùsanganyibwa mu ndekeelu mwà bisuku ne meetu amu, pèndè mwena kwitabuuja wa kàyì ùnyunga to mu dyondopa dyà kùdì Nzambì. Ki kwambayè mwàkasaamàye bikolè. Kusambilayè, kusambilayè. Ki bàmwè bàà ku bampandanjila kwambabò ne bàvwa ànu ne cyà kuya ne bwatu kangata ngàngàbukà kampànda. Mòna’s, bìvwa bifwànyìne kubàngata matùkù bwà kupeta ngàngàbukà. Ki yèyè ne: “Ndi—ndi. . . Kanwènji nànkù to. Lekèlaayi ànu nànkù.” Yèyè ne: “Piikalà Nzambi kàyì mungondòpe to, dìbà adi ndi mpingana Kumbèlu.”

232 Ki yèyè ne mukàjèndè kushààlayè nendè mu cibambalu amu. Kutùngunukakù ne kwenda kufiika ànu kufiika. Ki yèyè ne kubiikilayè mukàjèndè, kwamba ne: “Munanga wanyì, nkwatèku ku cyanza.” Yèyè ne: “Tùngunukà ànu ne kunsambidila. Kùdì kwènda ànu kufiika mpindyewu.” Yèyè ne: “Ndi—ndi ngeela meeji ne mindidimbì yìkaadi yènda yìpòna mu nyùngulukilu wanyì emu.” Yèyè ne: “Nkwatèku. . . Nkwatè ànu ku cyanza usambile, pàndì ngenda mpàtuka apu.” Kudilongololayè, bwà kutwilanganayè ne Nzambi.

233 Kwenzayè ànu bumubwelè mu nyumà cyanààna. Ki kwambayè ne wàkalòota ne ùvwa mwàlukile ùsanganyibwa lwà mu Oregon emu cyàkàbìdì, mwikàle nsongààlùmè, ùkòsa micì mu diitu. Ki yèyè ne mfùmwendè wa mudimu wa mu citùùdilu amu kwambayè ne: “Paul, bànda ùye ku luseke kampànda lwà

kakùnà eku, ne ùpùlà mucì kampànda, wà bunènè ne bule kampànda.”

²³⁴ Yèyè ne wàkabànda lubilu kakùnà aku ne mikòlò yèndè yà bunsongààlùme ayi, ne kuupulayè mucì awu, ne kuwùsònzayè, kushìmikayèmu kasuuyi. Kwambayè mùvwà mucì wà pèn awu mutekètàngàne, kasúyi kèndè katwe, kanènè, katuuta nseka yìbìdi aku kùmba kàbwela mu mucì wà pèn awu bilenga byà dikèma. Ki yèyè ne kuwùkwàtayè, ùdyàmbidila ne: “Èè, nèngwàmbùlè ànu too ne kwìnshì kwà kakùnà aku.”

²³⁵ Muntu mwímpè, wa dikàndà, kwambayè ne: “Mvwa ne ciibidilu cyà kudiibidija mwà kutwàngaja binù byànyì pamwè, ne kwambula ne nyimà, citùpà cyà citàmbe bunènè cyà muntu aci.” Mapùndà èndè àvwa mu nyimà wèndè ne ku makaaya, mabunda à mikòlò yèndè ayi awu. Yèyè ne: “Ndi mufwànyine kwambula citùpà cinènè cyà mucì,” kucitèèka pa dikaaya, kuumuka kuya. Kàdi yèyè ne: “Aci cìvwa ànu citùpà cyà mucì wà pàtupù ewu, kàdi,” yèyè ne, “ndi ànu. . .” [Mwanèètù Branham ùdi ùtòndola cikòlokolo—Muf.] (Mfwilaayikù luse.) Yèyè ne: “Ncìvwa ànu mwà kunyungisha citùpà cyà mucì aci to.” (Mfwilaayikù luse.)

²³⁶ Yèyè ne: “Ncìvwa ànu mwà kunyungisha citùpà cyà mucì aci to.” Yèyè ne: “Mémè kulwangana, kulwangana ne kuteeta bwà kuwùjuula panshì, kàdi ncìyi ànu mwà kuwùjuula panshì to.” Yèyè ne: “Mémè kupàtula dikàndà dyànyì dyònsò.” Yèyè ne: “Ncìyi ànu mwà kunyungisha citùpà cyà mucì aci to.” Ki yèyè ne: “Ndekeelu wa byònsò, mémè kushààla ne butekètè bwà dikèma, mémè kusòmba mweyemene ku mucì awu ne kubanga kudikùpula bisùùlùlù. Mémè kushààla ànu muzengèle yònsò.”

²³⁷ Ki yèyè ne: “Paanyimà pàà katanci, mémè kuumvwa diyì dyà mfùmwanì awu.” Kàdi yèyè ne: “Dìvwa ndìyi ditàmbe kwikala dyà kalolo dìmvwà ncìyi mwanjì kuumvwakù to.” Ki yèyè ne: “Pàngààkakùdimukà, diyì adi kungambiladi ne: ‘Paul.’ Kì mémè ne: ‘Yè, mfùmwanì, ncìnyì aci?’ Yèyè ne: ‘Cyùdi uwùkokela nànkù ncìnyì?’” Yèyè ne: “Èè, wèwè’s ngudi muntùmine diyì bwà mémè kupweka naawù mu citùùdilu, kàdi ndi mudizengèje naawu, bikolè be. Ncyèna ànu—ncyèna ànu mwà kucyènza to, mfùmwanì.” Yèyè ne: ‘Paul, kwèna umòna musùlù wa màyi wùdi wùpwekà kwaka wàwa anyi?’ Yèyè ne: ‘Eyowà.’ Yèyè ne: ‘Musùlù wàwa wùdi wùpweka too ne mu citùùdilu. Bwà cìnyì kùyi ànu uwèla mu màyi, kutùpikilapù ne kupweka mubàndepù too ne ku citùùdilu?’ Yèyè ne: ‘Ncìvwakù mwelèkù miinè meeji awu to.’”

²³⁸ Ki yèyè kuwùbùnguluja ànu cyanààna e kuwèla mu màyi àmu, kutùpikilapù, kwamba ne: “Kaa, ekèlekèle!” Kubangayè kusàmpula màyi, ne kutùpika, ne kwela mbilà mikolè, yà yìsaamisha mutù, pàvwàye wèndela pamutù pàà mavwala apu, ne wènda ùpwekela pa màyi, byònsò abi, mubànde pa mucì

ewu, wènda ùpweka, wèla mbilà ne: “Ndi ngenda mubàndepwèè! Ngenda mubàndepwèè!”

239 Yèyè ne, katanci aka, kwalukilayè mu yèyè, ùvwa menemene ànu munkaci mwà cibambalu amu, ne mukàjèndè wèla nendè mbilà. Ùvwa wèla mbilà ne: “Ndi ngenda mubàndepwèè! Ndi ngenda mubàndepwèè! Ndi ngenda mubàndepwèè!” Bânà bèètù!

Matungà àkaadi àkosoloka, Izalèlèlà ùdi ùtabuluka,
Bimanyinu byàkadyànjlà Bible kwamba;
Matùkù à bàà Bisàmbà byà bendè mmabala
ku minu, mùle ntèntè ne bintu bìdì byènzà
bwòwà;
“Alùkilaayi, Éyì nwènu bàdì batangàlàjìibwe,
kùdì bèènu sungasunga.”

240 Mukenji wa Díyì dyà Nzambì ewu wùdi Bulelèlà. Kwikala ne mwoyi anyi kufwà, Mémè ndi ngenda mubàndePù. Ncyèna . . . Ncyèna nkòkangana naaWù nànsha. Ncyèna nteeta bwà kukòkangana bwà Wòwò to. Ndi ànu muWǎngàte cyanààna, ne ndi ngenda mubàndePù. Badyudi bàjuukè. Nèmpicile mu mabwe ònsò. Nèmbwelè mu citùùdilu, òm̀wè dyà ku matùkù aa, ngenda mubànde pa Díyì dyà Nzambì. Amen. Ndi mutwìshìibwe ne nèm̀fikè kuntwaku.

Tùsambilàayi.

241 Bwà cinyì udi muswè kwenda kukòka mushikì wèbè wà mpèkaatù awu? Bwà cinyì udi muswè kwikala mu ngiikàdilù wùdi awu, kùyi mumanyè mwaba wùdi mwimànyine, wenda unyeemakana umuka ku ewu èkèleeziyà uya ku mukwàbò, umuka ku mwaba uya ku mukwàbò? Bwà cinyì kùyikù ànu uwùkùpa, pa nkùrusè, dilòlò edi, bwà kwenda mubànde pa Díyì? Bwà cinyì kùyikù ànu wangata mulayi wà Nzambì dilòlò edi ne kwenda mubàndepù upátuka mu cimvundù aci, ukabwela mu maulu maalàbàle makàngula mwàmwa, mùshindù awu? Kùlwanganyi naaCì mvità to. Kùtàcishikù naaCì meeji to. Cìtábùùjè wèwè ànu cyanààna, Cìtábè. M'Bukalenge bùdi kabùyikù mwà kunyungishìibwa to. Endà mubàndePù.

242 Pawikalà usaama dilòlò edi, angàtà mulayi wà Nzambì wàà ne: “Mémè ndi Mukalenge udi wondopa màsaamà èbè ònsò.”

243 “Nènsangalè bishi, Mwanèètù Branham? Ngàngàbukà ùdi wàm̀ba ne ndi ne disaamà dyà mwoyi, ndi ne kànsère, ndi ne *cikampànda*, *cikansanga*, cyònsò cìdiku aci. Mémè ndi mpudimaci, kamàmà. Ndi mpofo.” Cìdi, cìdi cìshintulula cinyì? Itàbùùja wèwè ànu mulayi wà Nzambì cyanààna wèndè mubàndepù.

244 Twàngatàayi dikombo dinène menemene adi, ne tùdìsàkaayi panshi apa, ne tùufundàayipù ne: “Disambila dyà diitabuuja

dyenjiiibù dilòòlò edi; mèmè nényè mubàndepù. Bible mmwambè ne: ‘Disambila dyà diitabuuja nedisungilè mubèèdi awu, ne Nzambi neàmujjuulè panshi. Piikalàye mwenzè mpèkaatù, nebàmufwilèyi luse.’ Mèmè ndi ngenda mubàndepù. Ndi nciitabuuja.”

²⁴⁵ Pawikalà mwenzè cilèma, pawikalà ne mutù mukolè dilòòlò edi: “Ewu udi ubwikila mpèkaatù wendè kàakutanta to. Kàdi ewu wâtonda mpèkaatù wendè neáfwiidiibwe luse.” Bwà cinyi kubènga kumutonda?

“Èè, cîndi ne cyà kwenza ncinỳi, Mwanèètù Branham?”

²⁴⁶ Mutondè, ne endà mubàndepù. Nzambi ngudi mwambè nànkù. Necikumùshe buludi mu mpèkaatù webè amu.

²⁴⁷ Kùdikù muntu kaaba aka dilòòlò edi, utu kacya kàyikù mutèèke dyeyemena dyèndè dilelèlè mu Nzambi bwà lupàndù lwà musùukà wèndè, kàdi muswè bwa bàkuvùlùkè mu disambila patùkaadi tujikija apa anyi? Swàku wèlè ànu cyanza muulu cyanààna, wàmbè ne: “Nsambidilèku, Mwanèètù Branham. Ndi muswè kwimansha ntàtù yànyì.” Nzambi àkubènèshè. Nzambi àkubènèshè. “Ndi muswè kwimansha...” Nzambi àkubènèshè, màndamù. “Ndi muswè kwimansha ntàtù yànyì.” Nzambi àkubènèshè, mwanèètù wa balùme. Nzambi àkubènèshè lwà paanyimà apu, mukalenge. Nzambi àkubènèshè, wèwè nsongàakàjì. Èyò. Ncyà bushùwà. Nzambi àkubènèshè. “Ndi muswè kuMwimanshila ntàtù yànyì ne kwenda ànu mubànde pa mulayì Wendè mpindyewu. Mèmè ndi ngiitabuuja ne Yèyè ngwàkalaya ne: ‘Ewu wâlwa Kùndi, Ncyàkumwipatakù to nànsa byà munyì.’”

²⁴⁸ “Ki mmùndi ndyùmva to ne: ‘Bàvwa bansambidile makèlèlè dilòòlò awu’s, Mwanèètù Branham; ncyèna muumvwè dishiilangana nànsa dikesè to.’” Aci kacýèna ne bwalu ne cyòci aci to. Mèmè ncyèna ngenda mubànde pa njyia yànyì to. Ndi ngenda mubànde pa Diyì Dyèndè. Mmulayì Wèndè.

²⁴⁹ “Mwanèètù Branham, mèmè ewu nkàadikù muyè ku cyoshelu, misangu yinaayi anyi yìtaanu, nteeta bwà kupeta Nyumà Mwimpè. Kacya ncitukù muMupetè to.”

²⁵⁰ Aci kacýèna cyùmvwija cintu nànsa cimwè to. Shààla wèwè ànu pa citùpà cyà mucì awu apu, necikufikishè buludi too ne ku citùùdilù, mu citùùdilù cyà Baanàabutè, mu citùùdilù cyà bansantu. Neùfikèmu. Shaala wèwè ànu pa cyèbè citùpà cyà mucì awu apu, ne elà mbilà mikolè ne mbila yà disaamuna Nzambi ne bukolè bwèbè bwònsò. Ki mùshindù wa kucýenza ngwòwò awu.

²⁵¹ Patùcìdi ne mitù yètù miinyika apa, udikù muswè cyà bushùwà bwà kwenda mubàndepù anyi? Dìbà adi, kaacintu kakesè kàdi munkaci mwà kutuuta ku mwoyi wèbè aku, udikù mwà kuswà bwà kulwa kùneeku ne kwimana kumpalà kwà

cyoshelu bwà katanci kakesè bwa túsambilè ne tükutentèkèlè byanza anyi? Tudi bafwànyine kwikala ne disànkà bwà wèwè kulwa.

²⁵² Twàngatè kaacintu kakesè kàdì katèèka mu nyùngulukilu wa mwoyi wèbè awu dilòòlò edi, kàmba ne: “Udi mumanyè’s, udi mupiile. Mpindyewu elà cyanza muulu.” Èyò.

²⁵³ Udi mutùpikile pa citùpà cyà mucì awu, citùpà cyà mucì wà mulayi Wèndè awu; mucì awu, nkùrusè uvwa mukòshìibwe awu. Jìngila mabòkò èbè ku nkùrusè ewu mpindyewu. Asà lwendu buludì ùlwe kaaba aka wámbe ne: “Mpindyewu nèngèndè mubàndepù. Mpindyewu mene nèncìtabùùjè. Nèncìtabè. Ndi ncìtabuuja. Ncyàkushintululakù meeji nànsha. Nènshaalè ànu ne Dìyì adi, too ne pìikalà wówò awu mushindikìibwe. Ne dîbà adi paanyimà pàà wówò awu numanè kushindikìibwa, Nèngòòlolè buludì cyanza ngàngatè mukwàbù, ne mbanga kwenda mubàndepù.” Nwamònu anyi?

²⁵⁴ Nènku ku mwakù ne ku mwakù, ku cidya ne ku cidya, neùkwatè kantu ne kantu kàtù Nzambì mukulayè aku. “Bwalu bintu byònsò bidi mwà kwenzeka,” bwà ewu udi muswè kwenda mubàndepù awu. Endà mubànde pa mulayi Wèndè, bwalu ncyà bushùwà ne newùkufikishè too ne ku citùùdilu. Newùkufikishè too ne mu Bwikadi bwà Nzambì.

²⁵⁵ Udikù mwà kulwa mpindyewu patùcìdì ne mitu yètù miinyika apa anyi? Ne ndi ndòmba bwà muntu kanà yònsò udi muswè àlwe kwimana ku cyoshelu, ànu bwà katanci kakesè cyaanàà bwà disambila.

²⁵⁶ “Ndi ngèda mubàndepù, Mukalenge. Mukalenge, ndi ngiitabuuja. Mpatà yànyì yònsò yàjiikìibù mu mpokolo awu. Mukalenge, nyewù ndwa. Ndi ncìtabuuja. Ndi ntùpikila ànu pa Dìyì dilòòlò edi, ne nèncìtabùùjè ne mwoyi wànyì wònsò. Ndi nKukwàcila ku Dìyì Dyèbè.”

²⁵⁷ Mukàjì kampànda wa musinga mukolè mmwimàne ku cyoshelu eku, bwà—bwà kushindikila Nzambì ne ùvwa wàmbilamù. Kanwènaayi baswè kulwa anyi, nwènù bàvwa ne mitù yènù miinyika, ne byanza byela muulu, ne baswè bwà banùvùlùkè mu disambila abu? Nudikù mwà kubànda ànu kùneeku cyaanàà anyi? Nzambì àkubènèshè. Bāndaayi ànu kùneeku cyaanàà. Ki cyòci aci. Lwayi ànu kùneeku cyaanàà ne nwimane mwab’ewu. Ambà ne: “Nèngèndè mubàndepù. Nzambì, Wèwè ngwákafila mulayi awu, cintu kampànda ncikookòle ku mwoyi wànyì, nènku nyewù ndwa mpindyewu buludì bwà kwenda mubàndepù. Ne nènshaalè ànupù too ne pààyàci kamfikisha buludì too ne mu citùùdilu. Ndi mpweka buludì too ne ku citùùdilu cyà bansantu bàà Mutàmbe bunène wa mu Dyulu.” Nzambì àkubènèshè. Abi mbìmpè. Lwàku buludì mpindyewu, wèwè udi muswè kwenda mubàndepù awu. Ànu mùshindù wùdì awu ne: “Ànu mùndì emu, ncìyi pa bwàsà.”

258 Vùlukà. Wèwè udi wamba ne: “Awu mmuci anyi?” Èyowà. Kùvwa mucì muupula, musangu kampànda, kàdi wàkaashiibwa cyàkàbìdì ku Kàlvaryò. Tùpikilà wèwè ànu pa wówò mucì awu dilòòlò edi, mwikàle ne milayì yà Nzambì, Dìyì divwà dikùdika pa mucì awu adi.

259 Mémè ndi ngenda mubàndepù. Nèncítàbùùjè, ne mwoyi wànyì wónsò. Ndi muswè ànu bwà kudyenzeja bwà kulwa kaaba aka kulabulakù bàna bèètù ku cyanza.

260 Nzambì ànùbènèshè, bwà diimana dyènù dyà bukitù adi. Ndi muswè bwà nùshaalè kaaba aka, ànu bwà katanci kakesè cyanààna, patùdi tusambila apa. Nzambì àkubènèshè, mwanèètù wa balùme. Mwanèètù wa bakàjì wa mushinga mukolè, Nzambì àkubènèshè. Mukalenge Yesù. . . ? . . . Nzambì àkubènèshè, mwanèètù wa balùme. Nzambì àkubènèshè, mwanèètù wa bakàjì. “Ndombòlèku.” Àkulombòlèku pa musùlù apu.

261 Vùlukàayi ne, mémè bu musadidi wa Kilistò, ndi mwambùle bujitu bwà kuyiisha kwà Dìyì. Ndi mwambùle bujitu bwà bujaadiki bwànyì. Ne ndikù mufwànyìne kwimana kaaba aka dilòòlò edi. . .

262 Ne muntu wa bidimu makùmi àtaanu ne bitaanu, anyi makùmi àtaanu ne bisàtù, wíkala ne bidimu makùmi àtaanu ne binaayi mu ngondo mwinâyì emu, ne mwimàne mwab’ewu ne mumanyè ne, nànsha mene cikèènà-kumònà cyà ndekeelu eci, ncifwànyìne kwikala matùkù àànyì a ndekeelu pa buloba. Ndi—ndi mufwànyìne kushiyangana neenù mu matùkù makesè aa. Ncyèna mumanyè cidìci cyùmvwija to. Tèèlejàayi ànu mukàbà wà mèyì awu ne nufile nkomenu mwènù pèènù munwàmònà amu. Mémè ncyèna mumanyè cidìci cyùmvwija to. Ndi mufwànyìne kwimana apa, mwikàle ngiitabuuja ndambù ne ncifwànyìne kwikala mayiisha àànyì à ndekeelu àndiku nyiisha, mmùneemu mene mu Phoenix, kàdi kwamba cintu kampànda cìvwà ciikàle cyà mafi, ne mumanyè ne kwànyì kùnyaaya kùdi kùsanganyiibwa pabwìpì, ne nèndumbulwishiibwè ku mèyì àànyì awu anyi?

263 Bàna bèètù bàà balùme, lekèlaayi nnwàmbilèku bwalu ebu, ne wènù bàna bèètù bàà bakàjì. Nukàadi babwelèbwèle mu masangisha. Nutu bamanyè cidìbi, dijingulula ne bikwàbò abi. Kacya nkàadikù munwàmbile cintu kampànda, mu Dìna dyà Mukalenge, cìtù kacyi cyenzèke anyi? Nènkònkè muntu kanà yónsò. To, mukalenge. Pa buloba bujimà, ne binunu byà bikèènà-kumònà, kacitukù cyanjì kwikalakù to. Nènkù ndi nnwàmbila bulelèlè dilòòlò edi ne, Mashi à Yesù Kilistò mmakùmbàne menemene mu mùshindù wà ne àdi àkùpula dikeji dyónsò, ne mmafwànyìne kwikala nànkù.

Kùdi Mpokolo mûle ne Mashi, (Ne wêwè udi
mwimàneKù mpindyewu.)
Makòka mu mijilu yà Èmanùwèlè, (Cintu
cìmwèpelè cyà bushùwà cidìku cishààle pa
buloba's.)
Mùdi bangènzàmpèkààtù bôbò badīnè
mwinshì mwà nkwaka awu,
Bàjìmija dikeji dyàbò dyònsò dyà dipiila.

264 Nèndombèku bambi aba mpindyewu, ne bânà bèètù bàà balùme, bu nwènùku mwà kupátuka mwab'ewu munkaci mwà bantu aba. Ewu yònsò udi. . . Ki mùshindù ngwówò awu, wunùtù nubìikila bambi bwà kusambilabò ne bantu anyi? Bambi bònsò bàdi kaaba aba, dībà adi, bàdi baswè, bàdi baswè kumòna misùùkà yìsùngidiibwa abu, bàlwekù kùneeku ne bìimanè bu kasumbu kàà disambila, mutùdi mwà kudiswika cimùkù, kudyùmusha ku bintu bikwàbò byònsò, ne kuditàpulula twètù biinè. Aba mbalùmè ne bakàji bàdi bàtwa citampì ku kwàbò kuyaayàbo, dilòòlò edi, ku Mashi à Yesù Kilistò, bàMukwàcila ku Dīyi Dyèndè, babàndepù bàbwela buludì mu Bwikadi Bwèndè, pa Dīyi Dyèndè, bàmba ne: “Ki mèmè ewu, Mukalenge. Ncyèna ne cintu nànsha cimwè cyà kufila to pa kuumusha mèmè mwinè, nènku ngangàtèku.” Nudikù mwà kulwa kwimana pàmwè naabò anyi, bu nwènù mwà kuswa? Muntu kanà yònsò udi muswè kulwa awu, àlwe ìmanè. Nzambi ànùbènèshè, bânà bèètù. Abi's mbilenga bikolè be. Ntu muswè kumòna bantu bàdi ne bukitù, bàdi bwalu bwà misùùkà bubàlenga ku mwoyi. Ngeela meeji, nwènù bânà bèètù ne, abi mbìmpè. Lwàyi ànu ku luseke eku. Abi's mbìmpè. Imànyinaayi pabwìpi apa. Mpindyewu twànjàayi ànu. . .

265 Bu mwimbi wa cisanji cyà pyànò mwà kuyakù ku mijiki, bu yèyè mwà kuswà, twìmbàayi musambu ewu, bitùùlùbitùùlù mpindyewu, ne musàngèelu wònsò, ne kaneemu kònsò.

266 Twètù katwèna tulwa ku cintu kampàndà cikwàtakaja to. Katwèna tulwa ku cintu kampànda ciikàle ànu cyà—cyà—cyà budìngìbudìngì to. Kàdi tudi tubwela mu Bwikadi bwà Nzambi, Yèhowàh wa ngulu yònsò, Udi mulaya awu, ne: “Mwaba wònsò wùdi bàbidi anyi bàsàtù badisangishe mu Dinà Dyànyì, Mèmè ndi mwaba awu munkaci mwàbò.” Akùlà Nendè mùdi mufwànyine kwakula ne mulundà webè amu, wamba ne: “Mukalenge, mfwilèku luse. Ndi mwenzè mpèkaatù.” Nènku netwikalè mwà kwimba.

Kùdi Mpokolo udi mûle nténtè ne Mashi,
Makòka mu mijilu yà Èmanùwèlè,
Mùdi bangènzàmpèkààtù bôbò bīnyija
mwinshì mwà Nkwaka awu,
Bàdi bàjìmija dikeji dyònsò dyà dipiilà dyàbò.

Mwívi uvwa upùnga ne lufù awu wàkasànka
 pa kumòna
 Mpokolo awu mu ditùkù dyèndè;
 Mwaba awu mèmè pàanyi, nànsha múmvwà
 mubi kumòna bu yèyè amu,
 Ndi nkúpula mpékaatù yàanyi yònsò.
 Kubangila ànu apu ku diitabuuja mèmè
 kumòna Musùlù awu
 Wùtù mpùtá Yèbè mimpetèshe,
 Dinanga dìdì dipìkulà ki dikaadi cyànyi cyena-
 bwalu,
 Ne ki ciikalàdi too ne pàngàáfwa.

267 Ikàlà wèwè ànu mukesè menemene mpindyewu. Kwéna cintu ciinè to. Nànsha umwe wa kutùdi kèna cintu ciinè to. Nènku ànu ne meeji matòòke ónsò mpindyewu, ne myoyi yènu yònsò, inyikaayi myoyi yènu ne mitù, myaba yònsò, mu nzùbu mujimà emu.

268 Taatù wetù wa mu Dyulu, ndi mumanyè ne Méyì Èbè mmalelèlè ànu menemene. Kaèna mwa kupangilakù to. Àdi Dìyì dyà Nzambì. Àdi Nzambì. Ne Wèwè wákamba ne: “Ewu udi ulwa Kùndì, Ncyàkumwipatakù to nànsha byà munyi.” Nènku balume ne bakàji aba, mu ditwishiibwa, bamanyè ne kí mbajaalàme to, mbalwè kumpàla eku, dilòòlò edi, Mukalenge, bwà kutonda ne mbapiile, bamanyè ne mbatùtuja kùdi dinyungakana kampàndà dyà munda mwàmwa dìdì—dìdì dibàtùmine dìyì bwà kulwabò ku Mpokolo awu. Nènku’s ki bóbò aba biimàne, ne mitù ne myoyi miinyika, bwà kunwàbo màyi à Mwoyi, cyanààna, àtù malayiibwe kùdi Nzambì awu. Bákidilèku, Taatù, mu Bukalenge Bwèbè. Mbèèbè Wèwè.

269 Wèwè wákamba ne: “Muntu nànsha umwe kèna mwà kulwa kùNdi pàdi Taatù Wanyi kàyi mumukòke dyàmbedi to. Ne bònsò bàdi Taatù muMpèèshe nebàlwe kùNdi.” Nènku bìdi bileeja ne Nzambì ngudi mufile bóbò aba kùdi Kilistò, bu dipà dyà dinanga. Nènku’s ki bóbò aba biimàne kuulu, Mukalenge. “Muntu nànsha umwe kèna mwà kubànyenga mu cyanza Cyànyi to.” Nènku ndi ndòmba, Nzambì, bwà Ùbàkùbèku ku njiwù dilòòlò edi, pàdìbo biimàne mwaba ewu apa, ne bàpèèshèku dibàtiiza dyà Nyumà Mwimpè pàcidìbo ku cyoshelu eku apa.

270 Bukolè bunènè bwà Kilistò buwujèku nsòmbelu yàbò mpindyewu! Nyewù bènji ditonda dyàbò. Bàalu kumpàla eku. Wèwè wákamba ne: “Ewu wàNjikula kumpàlà kwà bantu awu, Mèmè nèmмуjikùlè kumpàlà kwà Taatù Wanyi ne Banjèlò bàà cijila.” Tudi bamanyè ne mudimu awu ngùdi munkaci mwà kwenjiibwa ewu.

271 Mpindyewu, Mukalenge, bàtwèku citampì mu Bukalenge bwà mulayi, bwà Nyumà Mwimpè. Enzàku nànkù, Mukalenge. Icìkijàku Nyumà Webè pambidi pààbò, ne bùjèku tètè ne

Nyumà wa Nzambì udi ne mwoyi, bwà bààmònakù mwà kwikala majaadiki àdì ne mwoyi matukù ónsò à myoyi yàbò, bwà Bukalenge bwà Nzambì.

272 Mpindyewu batèèleji bàjuukilè kuulu. Bantu bònsò mu disambila mpindyewu. Netùsambilè bwà bòbò aba . . .

273 Mpindyewu, yònsò wa kunùdì udi mulwè mwab'ewu dilòlò edi, mwikàle udyùmvwa ne uvwa ne mpèkaatù pa mwoyi wèbè, mpindyewu kakwèna cintu nànsha cimwè cyùdì mwà kwenza to ànu kwitabuuja aci. Wa Cijila. . . Udi witabuuja *Eci* ku diitabuuja. *Eci* ndiitabuuja, bwà witabè. Yesù wàkamba ne: “Muntu nànsha umwe kèna mwà kulwa kùNdi pàdì Taatù Wanyì kàyì mumukòke dyàmbedi to. Ne bònsò bàdì bàlwa kùNdi abu,” Yèyè neàbàkidilè. Kèna mwà kwenza cingà cintu nànsha cimwè to, bwalu Yèyè ngudi mucilayè. Nwamònu anyi? Mpindyewu kwèyemenyiku disaluka kampànda to. Ikàlà mweyèmène Dìyì Dyèndè. Nwamònu anyi? Dìyì ndidì dyambè nànkù.

274 “Ewu udi umvwa Mèyì Àànyì ne witabuuja Ewu udi muNtùme, ùdi ne,” dībà dyà mpindyewu, “Mwoyi wà kashidi, ne kààkupìcila ku Cilumbulwidi to, kàdì mmuumùke ku lufù muyè ku Mwoyi.” Nyumà Mwìmpè ndilabula dyà kwikala muujībwe ne muvwàdikìibwe ne bukolè bwà mudimu. Kàdì dijikula ne dyakidila dyà Kilistò nkwikala ne diitabuuja ne ditonda dyèbè, ne kudyùmvwa mudìshikàmìne ne Nzambì wàkufwìdi luse ku mpèkaatù yèbè.

275 Nènkù mwimànyìne pa Dìyì Dyèndè, Yèyè wàkamba ne: “Muntu nànsha umwe kèna mwà kulwa pàdì Taatù Wanyì kàyì mumukòke dyàmbedi to.” Nwamònu anyi? Mpindyewu, Nzambì mmukukòke, dyàmbedi. “Ne ewu wàlwa kùNdi, Mémè ncyàkumwipatakù to nànsha byà munyi.” Nwamònu anyi? Nwamònu anyi? Wèwè—wèwè wacyàkididì. Cintu cìmwèpelè, wèwè udi ne . . .

276 Yèyè—Yèyè wàkafwìla. Mpèkaatù yèbè yàkafwìdiibwa luse, kùkaadi bidimu cinunu ne nkàmà citèemà. Wèwè udi ànu ulwa cyanàànà mpindyewu bwà kwitaba cyàkakwenzelàYe aci. Nwamònu anyi? Nènkù wèwè udi witabuuja ne Yèyè wàkafwà bwà mpèkaatù yèbè anyi? Udikù muswè kuMwitaba bu difuta dyà cibawu cyèbè anyi? Mu ngaakwilù mukwàbò, udi uMwitaba, bu mwàkangataYe mpèkaatù yèbè.

277 Udikù mwà kwikala ne disànkà bwà kuMusàkidila bwà dyangata dyà mpèkaatù yèbè anyi? Udi witabuuja ne Wàkacyenza anyi? Nànkù elàaku ànu cyanza cyèbè aci muulu, wàmbe ne: “Ndi ngiitabuuja ne Yèyè ùdi wàngata mpèkaatù wanyì,” amen, “ùdi wàngata mpèkaatu wanyì.” Èyo.

278 Mpindyewu, udi wèwè mpindyewu muntu mulongolwela dibàtiiza dyà Nyumà Mwìmpè.

279 Pawikalà kùyi mupetè dibàtiiza dyà bwena Kilistò to, umwe wa ku bantu aba neatangilè bwalu abu, bwà ùpetè dibàtiiza dyà bwena Kilistò.

280 “Kàdi mpindyewu pàcìvwà ànu Peetèlò wàkula méyi aa, kumpàlà kwà bôbò kubàtìjìibwa; pàcìvwà ànu Peetèlò wàkula méyi aa, Nyumà Mwímpè wàkapweka pambidi pààbò.” Bwà cinyi? Bònsò bàvwa bindile ne myoyi yizùka. Mpindyewu udi mwindile ne mwoyi wuzùka. Udi muswè cintu kampànda mpindyewu cyà—cyàkutwà citampì mu Bukalenge bwà Nzambi, cintu kampànda cìikalà cyà bushùwà kùdì. Nudi baswè kupet- . . . Kanwèna baswè kupeta Nyumà Mwímpè, yònsò wa kunùdì anyi? Kanwèna bacìswè anyi? Bushùwà, nudi baswè. Ki bwènù bukolè bulami abu’s. Nwamònu anyi?


Bàvwa badisangìshe mu cibambalu cyà kuulu,
Bàsambila mu Dìna Dyèndè, ke . . .
Babàtìjìibwe ne Nyumà Mwímpè,
Ki bukolè bwà mudimu kulwabù.

281 Nwamònu anyi? Kaa, ki cinùdì baswè mpindyewu ncyòci aci. Nènku udi mwà kucipeta, mpindyewu mene. Cìdi mbwèbè wèwè, mpindyewu mene.

282 Mpindyewu, bânà bèètù, bandaayi kùneeku. Twètù, muntu ne muntu mpindyewu, tütentekelàayi bânà bèètù aba byanza, ne túsambilè bwà kupetabò Nyumà Mwímpè. Bandaayi buludì kùneeku, bânà bèètù. Bandaayi buludì kùneeku.

283 Mpindyewu, disangìsha dijimà, elàayi byanza byènù muulu mpindyewu, bantu bònsò! . . .? . . .

284 Taatù wetù wa mu Dyulu, mu Dìna dyà Mukalenge Yesù Kilistò, ùjàku mwoyi ne mwoyi wònsò mwaba ewu ne dibàtiiza dyà Nyumà Mwímpè.

285 Petà Nyumà Mwímpè. Petà Nyumà Mwímpè, bantu bàdi apa aba bàdi biimàne ne bindile Bwikadi ne bukolè bwà Nzambi bwà kuwujabù nsòmbelu yàbò. 

MPUNGI UDI UPÁTULA MWADI MULUBÌDÌLE LUA63-0114
(A Trumpet Gives An Uncertain Sound)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu òmwè dilòlò, mu matùkù 14 à ngondo wa kumpàla, cidimu cyà1963, ku Assemblée Chrétienne mu Phoenix, Arizona, U.S.A. Ndyumusha pa mukaba wa mēyì ne dituuta ku cyamu mu kaabuñima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org